

# *KAJO KABUMUPASHI*

## *KA MUKIMYE KYAAKO*



Ketekelaitu, ketekelaitu,  
Byonse byakonsheka, keteke. . .

Byepi, pano mujije jishinda:

Pano Naketekela, pano Naketekela,  
Byonse byakonsheka, pano Naketekela;  
Pano Naketekela, pano Naketekela,  
Byonse byakonsheka, pano Naketekela.

Twayai twimane pano, na mitwe yetu yakunama.

Nkambo, awe kechi ekaletu lwimbo ne, pakuuba tubena kwimba kufumaashi ya michima yetu, “Pano Naketekela!” Banababwanga baambile mukimye kimo, panyuma Yesu yakwingila mingilo yavula yabulume, baambile mba, “Nkambo, pano twaketekela.”

Yesu waambile mba, “Pano mwaketekela nyi?”

<sup>2</sup> Abo baambile mba, “Twaketekela mba Anweba mwayuka bintu byonse kabiji amba Anweba kechi mukeba muntu nangwa umo kwimufunjisha ne.” Nanchi, Taata, bufuku buno twavuluka mba Anweba kechi mukeba mafunjisho etu ne, pakuuba atweba yetu tubena kukeba Enu. Nanchi twalomba mba Anweba musakwitufunjisha mwa kulombela, mwakwikela, kabiji ne mwa kwitabila. Kiswishai, Nkambo, kupichila mukuno kupwila bufuku buno. Inge paji kyo twabujinsha, kipanai kwiatweba, Nkambo. Twikipuzha mu Jizhina ja Yesu. Amena.

<sup>3</sup> Nayuka namba anweba bavula bufuku buno mwaimana ne jikwabo. Kabiji, pangye, twakusambakana mabuumba ajikwaambanga mba bakakalwa kutwela, kabiji babena kutelekela ku mawaileshi abo mumyotoka yapusanapusana. Kabiji tusakweseka kuubatu bukiji bukiji bufuku buno, bwa pa Mulungu bufuku, pakuuba mba tupane kimye kyakulombelela bakolwa, kwikala namulaini byonka byo tusakwikala naji papo. Bino tubena kupana ino pwijilo bufuku buno mukulombelela bakolwa.

<sup>4</sup> Kabiji Nakeba mba anweba munshimikwe mu...abye Byambo Byazhila byakwa Lesa, mu Lwitabilo, alo lo Lwitabilo lwa kino kimye. Alo Lwitabilo! Kikakebewanga lwitabilo lwavula kukila byokyajinga mu nkulo iki yonse, mambo alwe ke lwitabilo lwa kushikulwa, kutwaalwa mwiulu. Kabiji twakeba mba bufuku buno muketekele mu byonse byo mwamonapo, kumvwapo, Kyambo kyo mwaumvwapo kyasapwilwa, abyo—

abyo biyukilo ne bya kukumya byo mwamonapo kubiwa. Twasaka mba anweba mubungizhe byonsebye mu muchima wenu, kabiji ne kulangulukapo, kana abye bya Lesa nangwa ine.

<sup>5</sup> Kiji pamo nobe Elisha wakala, waambile mba, “Inge Lesa ye Lesa, nanchi Mwingijilainga.” Kabiji umvwe Yesu ye uji pakachi kabintu byonse ku Mwinakilishitu, nanchi Nalanguluka mba twafwainwa kulekelelako bintu byonse ne kulamachila kwi Aye. Vulukai, Aye ye Pakachi, Aye ye Kabangabanga ka Kukabeta ka buyeke, Aye yo Mpelo, Aye ye Bulumbuluke. Kabiji umvwe Aye Kabangabanga ka Kukabeta ka . . . Kujitu kintu kimo akyo kyakonsha kutongola ku kabangabanga ka kukabeta kabuyeke, awo ye kampasi ye mubena kwendelapo. Kabiji Kampasi ye Mbeni kweseka kwi mwendeshapo ke Kyambo, kabiji kimye kyonse Kyambo kitongolatu kwi Aye.

<sup>6</sup> Kabiji kyamwekanyika nobe tubena kupita mu kimye kikatampe kya kumanyikwa ne bya meseko, bya kukumya bya kimye kabiji ne kumanyikwa pakachi kabyaalo, kabiji ne bintu byamisango yonse bibena kumweka, kabiji kimye kimo Amiwa ngikala wazhokolokwa nobe, konse konse Amiwa kotala, kijitu pamo nobe mu . . . mubwato buji pakalunga. Kabiji Napewa kutangijila Bwato. Pano tusakwiyuba byepi? Kabiji umo waiya na kisochi kitoka, wabaya kukila bwato bwami bimye aduleendi. Bino tukapita peulu yabo, byonsetu. “Atweba twakila mukushinda monka Mwiaye.” Aye Kapitawa, Kapitwa Mukulumpe, wakwata kulutambo kumpelo ya bwato, Aye uketupishamo. Tukapita peulu yabo bonsetu.

<sup>7</sup> Bino, bufuku buno, pakuuba mba tupelawizheko kabiji mulupukeko bukiji . . . Twasachila kwendesha kwenu kwamisiso yalepa, ne bikwabotu, kabiji byo mwafwainwa kwendesha, kabiji ne kwipana kwenu. Kabiji, monai, akyo kya konsha kundengela Amiwa nobe kwimanatu ne kutwajijila nakwaamba kabiji ne byonse byo Nafwainwa kuuba amba nemukwashe. Pakuba inge Amiwa jikuno Ngeseka kubikamo bintu byonse byo Nakonsha, mukupana bukwasho mukimye kyonji kuno. Pano tolai . . . Inge mwapani kimye kyabaya bingi pakimye kimo bantu kechi bakonsha kwibivuluka ne. Anweba— anweba mwakonsha kutolapotu kintu kimo ne kwikikwachijila poso bekimona. Kabiji mumichima yabo umvwe baikala bashikamana, apo po . . . nachi pano ke kwibafunjisha kintu kingi. Kuyatu tapulo pa tapulo akwe sakatubena kuya.

<sup>8</sup> Pano, lombai pakuuba mba mwikale bachichika, kabiji ne kuketekela lubuko bufuku buno. Naketekela mba kechi kujipo jipuzho jiji jonse mumilanguluko namambo a kimye kyo tubena kwikelamo. Naketekela mba kechi kujipo jipuzho mumilanguluko yenu kana Lesa uji mukachi kabantu Banji nangwa ine. Naketekela mba anweba bonse mwaketekela kyokyo. Kabiji Ami . . . Kechi kujipo luzhinauko mu milanguluko yami pa kikyene ne. Kabiji Na—Na—Nayuka bantu bami,

batemwe bami, balunda ba Kilishitu, ne baana ba—ba Kilishitu, baketekela kyokyo.

<sup>9</sup> Kabiji kipana lusekelo lukatampe pa kuyuka mba uji na Mbila yafuma kwi Lesa, kabiji wi ipana kubantu ne pakumona bantu batambulwila Kyokyo. Nanchi watala panyuma ne kwaamba mba, “Twasata kwi Anweba, Taata.” Oo, kikala na lusekelo lwabaya bingi pakumona baana saka babena kuja Shinkwa awo watumwa kwiabo! Umvwe wavuluka mba kyajinga kimwesho myaka yapita kunyuma, ponka pano pa tambanako? Abyo ibyo, “Aye Shinkwa wa Bumi.” Mulongo Neville, wikivuluka. Bulume—kimye kya bulume!

<sup>10</sup> Pano twayai tuzhikule, inge mubena kukeba kulondela tangilo nangwa kubikapo kiyukilo, kijitu... Naketekela mba kechi kyakonsha kwikala kyaitabilwa kwikala napwijilo kwa kubula kutanga Kyambo kya Lesa kabiji ne kubula kwaambapo byambo ne, inge isakwikala pwijilo ya kulombelela bakolwa nangwa ya musango uji yense. Atweba bonse twaumvwa. Kechi kujipo mwenyi mukachi ketu ne, Naketekela. Bino atweba bonse twayuka lubuko byo luji. Kechi kintu muntu kyo akonsha kukubila ne; ke kintu akyo Lesa kyo emubila jimo. Lupulukilo nalo luji nandonda imotu. Kijipotu, ke, kuuba mba mulengele bantu betabe mba abwe Bukine. Kabiji Lesa wikifunjisha mu Kyambo Kyanji kabiji wabwela wikishiniikisha kuboba bantu be Kiketekela, mambo Aye waambile mba, “Bintu byonse byakonsheka kubooba baitabila.”

<sup>11</sup> Anweba mwaambamba, “Kechi pajipo kyashupa kwi Lesa ne.” Mwiikiketekela akyonyi? Kechi kujipo kibula kukonsheka kubiwa kwi anweba ne, neako. “Mambo bintu byonse byakonsheka *kwiabo*,” (Lesa ke Muntutu umo) “kwiabo baketekela.” Mwamona? Nanchi kechi kujipo kyakosa kwianweba ne, mambo anweba, inge mwakonsha kuketekelatu.

<sup>12</sup> Pano mu Bamfumu Mutanshi, kyapitala kyabu 17, Nasaka kutanga maveleshi atanshi seebeni, inge Nkambo waswa.

*Ponkapo Elaija mwina Tishibe, muzhi wa mu Gileada, wamwambijile Ahaba mba, Monka mwaikajila YHOBA Lesa wa Isalela nabumi, yenka ye Ng'ingijila, kechi kukekalapo kime nangwa mvula pa ino myaka ne, poso na jwiwi jami.*

*Kabiji jiwi ja YHOBA jaishile kwiaye, mba,*

*Fumako kuno, kabiji uyenga ku musela, uyenga kumusela, ukafyame ku kakola ka Kelita, kaji ku Yondano.*

*Kabiji kikekala, amba obewa uka tomanga mu konkaka kakola; kabiji Nakambizha bikwangala bikakujishanga konkakwa.*

Monai, “bikakujishanga *konkakwa*,” kechi kutu kukwabo ne. “Akwa!”

*Kepo ayile ne kuuba monka mwayijile aye YEHOBA, nangwa jivi ja YEHOBA: wayile ne kukekala konka ku kakola ka Kelita, kaji ku musela wa Yodano.*

*Kabiji babikwangala bamuletejilenga shinkwa ne nyama lukeelo, kabiji shinkwa ne nyama mabanga; kabiji watomenenga meema mu kakola.*

*Kabiji pakupitapo moba, aka kakola kaumine, mambo kechi mwajingapo mvula mu kyaalo ne.*

<sup>13</sup> Aye Nkambo abikepo mapesho Anji pa kutanga kwa Kyambo Kyanji. Kabiji pano, bufuku buno, Nasaka kusenda kinshina kufuma papo, kya telwa mba, “Kajo ka kumupashi ka mukimye Kyaako.” Lukeelo luno twajinga na—na lufunjisho pa—pa “Kwingijila Lesa mwingilo, nangwa kweseka ku mwingijila Aye kwakubula kwi. . . -ala kimye kyafikizhiwa ne, mu kimye, pa mpuzha, nangwatu aye muntu.” Kabiji pano awe ke: *Kajo Kabumupashi Ka Mukimye Kyaako.*

<sup>14</sup> Awe ngauzhi, Elaija, kechi twayuka byavula pe aye ne. Bino twayuka mba wajinga kalume wakwa Lesa, kabiji kalume wakwa Lesa wa mukyokya kimye.

<sup>15</sup> Kabiji Lesa wayingijisha kala mupashi wanji, wajinga pe Elaija, ke bimye bisatu, kabiji walailwa jibiji jikwabo; bimye bitanu, ke lusa. Wamingijishe pe Elaija; wayishile pe Elisha mu bibese bibiji; wajinga pe Yoano Mubatishi; kabiji wafwainwa kwiya kutatwilo ya Musongwa wa Bugentila; kabiji ukeya ne Mosesa pa kutwala ba Yudeya kumuzhi. Abyo ibyo. Bimye bitanu byo alaya Lesa kwingijisha mupashi wakwa Elaija, kabiji wikyuba kala jinga jisatu.

<sup>16</sup> Pano, awe ngauzhi mukatampe, kechi twayuka koafumine ne. Twamuyuka mba wajinga mwina Tishibe. Pakuuba byo aishile. . .

<sup>17</sup> Twayuka bingi bicheche pa bangauzhi. Kechi twayuka kobafuma ne. Kechi bimye byavula ne. . . Nobe, Amiwa kechi nayukapo awo waishile kufuma mu kipwilo nangwatu kuyuka kisemi kyanji ne. Bajingatu bantu babyokabyo bajinga babula moyo, kabiji, bimye byavula, ke babula kufunda. Kabiji kechi banembelepo kintu kiji kyonse ne, abobene. Isaya ne Yelemiya, ne bakwabotu bavula, ba nembelepo bintu bimo, bino awe muntu mukatampe Elaija kechi wanembelepo kintu nangwatu kimo ne. Bavula ba mwiabo kechi banembelepo ne; kapepo kechi bayukile kunemba ne. Pakuuba bajinga bantu ba bumi bwapita mubintu byakonsa. Kechi kujipo muntu mu Baibolo nobe boba bangauzhi bakala ne. Abo bajimbulwile ma bumfumu, bamfumu, bantu, bipwilo, ne bikwabotu byashala, kabiji bayimene kyakonsa na Kyambo kyakwa Lesa, kabiji Lesa

wibashinikishe kwikala baji bulongo. Bajinga bantu babumi bwapita mubintu byakonsa.

<sup>18</sup> Kabiji awe Elaija wajinga muntu awo wakijilemo kupita mubintu bya konsa. Aye wajinga muntu wamungyetu. Aye wafumine mungyetu; aye waikela mungye. Aye Baibolo waamba mba bivwalo byanji byajinga bya booya boya. Aye wipombebe mukiseba kya mukoko, kabiji ne mwaayi, wa kiseba kya ngamela kyo apomba mu kifuka kyanji, bingi. . . masuki alepa kufika ne mukilungi kyanji, kabiji Nafwainwa kumulanguluka nobe wajinga muntu wamwekelo-yakonsakana bingi, ne pa kumumona.

<sup>19</sup> Bino kechi twa . . . bonse kechi bafwile ne. Abo kechi bonse—bonse bafwile ne. Mumoba a Kinje kya Nikeya, anweba bantu bavula mwatanga *Akyo Kinje kya Nikeya kya Kipwilo Kitanshi*, byo kebelenga kulengamo kabungwe kamo ne konauna bipwilo bikwabo, ne kwiyatu mukimo, byo bajinga na Kinje kya Nikeya, bantu bamwekelo yakonsakana nobe Elisha bayishile kufuma mungye, na kujatu bya kubinchi bunke bwanji; bantu bamwekelo yakonsakana. Pakuuba bamushingi, ba peene-peulu, bajinga bakwa Kositaini, ne bakwabotu, bazhindamikilepo mawi abo. Mambo abo, byo bajinga bangauzhi, bayukile mba jipeke ja wichi ja Kipwilo kya Musongwa ja fwainwa kuponena mumushiji, pamotu nobe aja jipeke ja wichi mu Musongoshi ja ponejile mu mushiji. Kabiji ja yikele momwa pa myaka kiumbi kimo.

<sup>20</sup> Ao oene mambo kyo banembela mu mabuuku buleelo mba, “Ujipi awa Lesa wazhindama wakonsha kwimanatu na kutala, na kumona baana babacheche na kwibatapa, kabiji ne banabakazhi kwi batabaula ku mabokwe, ne kwikalatu mwiulu kabiji ne kwaambapo kintu pakikye ne?” Abo kechi bayuka Kyambo ne. Aja jipeke ja wichi jafwainwa kuponena mu mushiji. Kyakonsha kwikala byepi Lesa waoloka waimanatu na kutamba Aye Yeka Mwaanaji wafwa ne kumushipila mate, ne bintutu bikwabo? Bino kijitu mwayila Kyambo, byo kyafwainwa kubiwa. Kabiji abyo byo byo kiji ne pakino kimye.

<sup>21</sup> Awe muntu, wajinga muntu mukatampe bingi. Aye wajinga na kisemi kya bubi kunyuma yanji. Ahaba wajinga mfumu, bashanji kunyuma bajinga babubi. Kufumatu kwi Solomoni, balondakenengatu bamamfumu batama bonka bonka. Kabiji awe muntu, Ahaba, awo waikela myaka tweeti-tuu pa bufumu mu Samaliya, aye wajinga wakila mukutama pa bonsetu. Aye kine wajinga wabintu bya katatakatu. Aye waketekejile mu bupopweshi, kine. Kabiji aye watingatu mu ngubilo ya bukatatakatu. Aye wajinga na foo aduleendi bangauzhi ba ki Hebelu, bonsetu bajinga bafunda-bulongo ne kufunjishiwa. Lesa wamutumijile umo kabiji aye kechi wikiketekejile ne, kabiji awa wajinga Elaija.

<sup>22</sup> Pakuuba Elaija, awe mwina Tishibe, wajinga muntu wa mungyetu. Kechi muntu wajinga na mwekelo yawama ne; aye wajinga na mwekelo yatamatama. Kabiji juba jimo, Ahaba byo lengele bubi bwakilamo kya kuuba mba Lesa kechi wakonsha kumulekela mambo ne, Aye waambile kwi Elaija mungyetu. Kabiji byo byo ayishilenga mujishinda ku Samaliya, nobe byonka byo Ne kimweshwa kimye kyonse; kape suki itoka yalepa mukilungi kyanji, mutwe wa kipala wasama mu mute, tumeso twachepa twalepuluka, kunyuma na mukombo mu kuko kwanji, ne mwemweselo mu kilungi kyanji, wayile wakafika ku mfumu wa Isalela, ne kumwambila mba, “Aye... Kechi kukekalapo nangwa kime ne poso Neyita.”

<sup>23</sup> Lesa tupai bantu banji muyewa musango, monai, bantu bayuka kyobabena kuuba na **ABYO BYOBYAAMBA AYE NKAMBO**.

<sup>24</sup> Bino, twamona mba saka akyangye kuba kikye ne, Lesa wamwichile. Lesa waambile nanji kabiji, okao mambo, aye kechi wajingapo na moyo wakintu kiji kyonse ne. Aye kechi wajingapo na moyo na mbila yanji ne, kuuba kya mweka akyo ne; aye wayukile mba kisakumweka! Aye wayukile mba momwayijile Kyambo kya Lesa, kabiji wayukile mba ye ngauzhi wakwa Lesa wa mukyokya kimye. Okao mambo nangwatu mfumu wakonsha ku muchibako mutwe wanji, ne kumutaya mukaleya, kyonse kyo bakonsha kuuba kwiaye, kechi kya muletejilengapo lupusano kwi aye ne; aye wajinga na mwingilo, “**BYO BYAAMBA AYE NKAMBO**,” Monkatu mu kilungi kya mfumu. Muntu washupa byepi! Bino saka akyangye kuuba kikye, kwaambila jimo na mambo akikye kyaashi. . .

<sup>25</sup> Mambo Lesa kechi ukaleka bubi kwakubula kumanyikwa ne. Pafwaiwa kwikala kumanyikwa. Nga mizhilo yawamina peepi kwakubula akwa—akwa kumanyikwa? Buwame bwafwainwa kumweka byepi, mukwaamba mba, “kiji kyabula kuswishiwa mu mizhilo kunyema na kyeya,” kabiji bino kechi kiji na malipilo ne, nangwatu kumanyikwa ne? Kechi wakonsha kwikala ke muzhilo ne. Nanchi kuji kumanyikwa na mambo abubi. Kabiji umvwe Lesa walenga muzhilo uji, kabiji awa—awa muzhilo wazhilululwa, apo pafwainwa kwikala kumanyikwa.

<sup>26</sup> Kabiji akye kyaalo kyazhilulwile mizhilo Yanji. Oo, bajinga na kipwilo, bajinga na tempo. Bajinga na bantu bavula bafunda bingi. Bajinga na bangauzhi kyaalo kyonse, bajinga na masukuulu abo, kwi balululatu nobe mashinyi. Kabiji bajinga na bangauzhi bavula bingi, bajinga na bavula ba—ba ng’anga, bajinga na bavula banembeshi, kabiji bajinga na bupopweshi bwavula bingi, bino bajinga kwalepa bingi na Kyambo kyakwa Lesa. Nanchi Lesa kechi waichilepo muntu mu kachi kabo ne, kabiji ne kumutuma na **ABYO BYOBYAAMBA AYE NKAMBO**.

27 Pano monai Aye byo alama ba Kwanji Mwine. Saka Aye ukyangye kutuma ngauzhi wanyi na mbila, Aye waambile mba, “Elaija, yanga ukabuule Mfumu Ahaba bino bintu. Kabiji pano, inge wikyuba, ponkapotu ukafumeko kwi aye bukiji bukiji, mambo Nakunengezhezha mpuzha kwa kuya mukimye kya kyanshi. Amiwa kakulama, Elaija, inge kya kuuba mba wasapwilatu Kyambo Kyami, waubatu byonka byo Nakubula mba ube.”

28 Pano Nsakupashang’anya aye nyingijilo ikatampe, bufuku buno, ya kwa Elaija kabiji nena kimye kya kwa Elaija, na kimye kyo tujimo. Naketekela bipasha pakatampe bingi. Nalanguluka pa byaalo... inge Na... twajinga na kimye kya kubwela panyuma, pakuba Nasaka kubika kimye kyabaya bingi kulombelela bantu.

29 Nanchi inge twakonsha kubwela kunyuma ne kumona, Isalela wasendele Palasitani mu musangotu umo ne atweba byo twasendele uno United States. Twaishile muno mu United States ne kufumyamo bayikelengamo, abo bajinga ma Indians, ne kutambula ntanda. Kabiji ne Isalela byo ayishile mu Palasitani, mu buntangi bwaka Yoshiwa, na Lesa, ne kufumyamo bangikazhi ne kutambula ntanda.

30 Kabiji bamamfumu babo batanshi bajinga bantu babulume: Davida, Solomoni, ne bantu bayukanyikwa. Bandamakyaalo betu batanshi bajinga bantu bayukanyikwa bingi: Washington, Lincoln, ne bakwabotu. Pano pakuya kulutwe bandamakyaalo nangwa ba mamfumu bayilengatu na kubola kimye kyonse, kabiji kumpelo po kwayishile ne yuwe Ahaba. Kyaesakanatu pamo, pamotu na moba etu. Kabiji bantu bafikile pakipimo kya kukebatu bya katataka kwa kubula kukeba kumvwa ne Kyambo kyakine kya Nkambo ne.

31 Kabiji mwafwainwa kutwelelamo, pa bantu banji na milanguluko yabukatataka muyewa musango, nga byo akonsha kwibambila kalume wa kine wa Lesa. “Kika, aye wajinga wa vundankanako, aye wajinga wa pusanako mu milanguluko. Kechi kwa konsha kwikala kintu kya musango yewa ne.” Abo bajinga bapopweshi, bapopweshi bingi. Bajinga na banabalume ba bukishika, bajinga na bantu ba bukishika. Bajinga bapopweshi bingi.

32 Nanchi aye wayukile mba kyakila pa kufundatu kwa masukuulu amambo a lesa, kikasenda kyakila pa—pa mbila ya kimye kyonse, kya konsha kusenda kyakila pa kusapwilatu kwa Kyambo, pakuuba mba michima yabo ya bujibwe yilalake. Aye wayukile mba kisendatu ABYO BYOBYAAMBA AYE NKAMBO pa kutuma luzhachisho pa boba bantu. Nanchi wayukile mba inge waya na ABYO BYOBYAAMBA AYE NKAMBO (Kabiji kyajinga ABYO BYOBYAAMBA AYE NKAMBO.), kukana Byobyoy, kyajinga luzhachisho. Twamona kyokyo mu moba etu,

ne atweba. Twamona kyokyo mu juba jiji jonse. Kechi kuji kyashalapo ne kanatu luzhachisho umvwe mwakila pa mulaini wa lusa.

<sup>33</sup> Pano, akyo ke kipasha kya kokwa, kuuba mba, Nsakupashang'anya Elaija na kipwilo leelo, kipwilo kya leelo. Luzhachisho saka lukyangye kwiya, aye watambwile iye mbila. Elaija, aye waimenejileko, byo bamulaminenga ku mubiji, kanjo kaji ka kumubiji, mambo kechi kukanoka mvula ne, monka mwaila Kyambo kya Lesa, pa myaka isatu ne bang'ondo batanu na babiji, nangwa kanatu Elaija waamba mba yinoke. "Kimye kyonse kyo ukaamba, Elaija, abyo byo byo kikekala." Okao mambo wayile ku mfumu, ne kwaamba mba, "Kechi kukekalapo nangwa kime ne kana na jiji Jami." Akyo kyajinga ke—ke kisendwa, kechi ibyo nenyi? Ayo nayo ke mbila!

<sup>34</sup> Kabiji pano tusakupashang'anya na kyaanshi kya bumupashi bwa leelo. Pano, atweba bonse twayuka, twayukisha bingi bulongo, amba kuji kyaanshi kyabaya bingi kya bumupashi muntanda leelo, kwamba mwaila bumupashi. Kabiji, mwayukatu, akyo kyaambijilwe jimo na bangauzhi, peepi pepi na Kwiya kwa Bubiji kwa Kilishitu amba byo kikekala? Waambile mba, "Kukekala kipowe muntanda, kabiji kechi kikekala kya shinkwa yeka ne, pakuuba ke kya kumvwa Kyambo kya Lesa." Kabiji aja juba ke kino kimye kyonka, "kumvwa Kyambo kya kine kyakwa Lesa." Pano, akye ke kipasha kya kyaanshi kya kumubiji na kya kumupashi.

<sup>35</sup> Bubi ne kubulwa luketekelo, ku pichila mu bafunjishi babubela ne baleta bintu bya katataka mu kipwilo, kyo kyaleta yuwe musango, wa luzhachisho lubena kwiya. Nanchi bafutukile kufuma ku Kyambo kyakwa Lesa ne ngauzhi Wanji, ne kwalulukila ku Kyambo kiji na ng'ambilo muji mulaka wa masukuulu abyambo bya lesa.

<sup>36</sup> Inge mwamona papo, ke pakyokakya kimye Lesa kimye kyonse wimikapo kintu kimo. Mambo, Aye, kimye kyonse, Aye kechi ubapo kintu nangwa kimone kana patanshi Aye wikisolola ku bantu, kabiji Aye kimye kyonse wikisolola kupichila mu bakalume Banji.

<sup>37</sup> Bino, pakuuba Elaija, mu kikye kimye, wajinga na kifulo kya bufyafya akyo Lesa kyo amunengezhizhe kuyako. Akyo kyo kintu kyo tubena kukeba kumona ponkapano sakatukyanyge kulombelela bakolwa ne. Elaija wajinga na mpuzha yabufyafya yo anengezhezhe Lesa Ayemwine. Bino, kipwilo kechi kyo kya munengezhezhe mpuzha ne, mfumu kechi yewamunengezhezhe mpuzha ne, aye mwine kechi ye winengezhezhe mpuzha ne, pakuuba Lesa ye wamunengezhezhe Elaija mpuzha ya bufyafya kwa kumujishisha mukimye kya kyaashi, iko kobamunengezhezhe kanjo pajuba pajuba. Aye kechi wasakamene mba kikamweka keesha kika nangwa kusakamana



kuuba mba kanjo kakaleka kwiya ne. Lesa waambile mba, “Nakambizha ba bikwangala kabiji bakakujisha.” Kyajinga kintu kyawama bingi, ke kipasha kyakifulo kyetu kyabufyafya mwi Kilishitu.

<sup>38</sup> Kimye kinje kya kyaalo kyonse ne byonse bibena kubiwa mu buleelo, byambiwa mba, “Aa moba a mingilo ya bulume apita.” Abwa bulume bukatampe bwa Lesa mu bipwilo bwafumishiwamo. Abo booba nobe, ne jikwabo, kafwako kyo banji nakyo ne bino “nobe kyeela kya lubemba kivuma kabiji ne simbo uvuma.” Twayuka kyokyo kuuba mba bukine. “Kabiji ne musango wa bwina lesa, bino saka bakaana Bulume bwao.”

<sup>39</sup> Kijitu pamo na kyaubile Davida, lukeelo luno, na bikochikala, wafumine ku Kyambo. Kimye Kyambo byo kyaletelwe ne kupewa kwi abo, kechi Bekikebele ne; okao mambo, bafumineko kwi Akyo.

<sup>40</sup> Abyo abo bantu byo baubile mumoba akwa Elaija, bafumineko ku Kyambo. Abo balangulukilenga mba baji na Kyambo, bino kechi bajinga Nakyo ne.

<sup>41</sup> Pano monai, nanchi, mu... mukimye Aye kya kumanyikilamo wabula kwitabila, Aye walengele jishinda ja waitabila. Kintutu kimo Aye wikyuba kimye kyonse. Mumoba Aye byo ayilenga na koonaua ntanda na meema, Aye walengele jishinda ja kupulukilamo Nowa. Mumoba Aye byo ayilenga na kwibalobesha bena Ijipita, Aye walengele jishinda ja kupulukilamo bantu Banji kukilang'anya pa kalunga. Nga Lesa byo alenga jishinda Janji! Kabiji apa pabula jishinda, Aye jo jooja Jishinda. Aye jo jooja Jishinda!

<sup>42</sup> Pano twavuluka mba twafika mukimye akyo... bimye bimo bikatampe abyo jishimikila jikyangye kuyukapo ne. Kechi kiji mba kana mutwe wakondo uji na mizailo yabembela, ne mutwe wabikwako, yetwafwainwa kuchina ne. Ke bipwilo byo byo twafwainwa kuchina. Ke kimye kyo tubena kwikalamo kyo twafwainwa kutajisha bulongo.

<sup>43</sup> Pano monai, bino Lesa walengele jishinda jakwa Elaija ja kupulukilamo. Kabiji Aye walenga jishinda ja baana Banji ja kupulukilamo pa kino kimye, bukaji ne bintutu bibena kwiya.

<sup>44</sup> Mambo, Lesa kuuba waikala waoloka mu kuzhachisha aba bantu ne kwibatuma kulumanamo, ne kwibizha Sodoma ne Gomola, kabiji ne kwibizha Kapenama pakachi ka mukalunga, ne kuzhachisha abya bisemi, ne Sodoma ne Gomola, ne kwituleka atweba kuuba bintutu bimo kwa kubula kumanyikwa ne. Atweba kine twatongwelwa luzhachisho nobe byonka kine byo batongwejiwe luzhachisho. Pano twamona kuuba mba... .

<sup>45</sup> Abye bintu inge byayiya, byubilo byakatataka bya mukyokyo kimye, Lesa wayimenye muntu mukyokya kimye, nangwa mba waimenye muntu, nangwa byokabyo, mukulwisha mazhita, kabiji abo kechi batelekele kukyokyo ne. Abo balangulukile

mba wajinga wakonya, walubankene mu milanguluko yanji, aye wajingatu wakala wakisangajimbwe, wabulamo maana wafuma mungye, ye bazelula-kujiisaka. Bino, nangwa byokabyo, aye wajinga na Kyambo kyakwa Lesa.

<sup>46</sup> “Akyo Kyambo kechi kilumbulula byo Kyaamba ne,” byo baamba leelo. “Oo, kyawama, Baibolo ke buuku wajishimikila.” Nalanguluka mba akye mwikimona, pa kino kimye baamba, mba, “Eva kechi wajile epo ne, aye wajile...” Kyajinga kika? Naketekela... “Kyajinga apilikoti,” pano byo baamba. “Kyajinga apilikoti.” Kabiji kuuba, amba, “Mosesa kechi waletele baana kupita mu Kalunga Kachila ne. Kyajinga ke kintete kyabaya bingi, kooka kwapelela kalunga, kabiji bapichile mu kalunga kamantete.” Pano nga meema aubile byepi, m-e-e-m-a, afungilwe mbaji yonse ibiji, bapichile pa mushiji wauma, byepi pano? Oo, amo mwabula maana! Bino, mwamona, kisenda musango wajoja juba pakuuba mba bukaji bwakwa Lesa bwiye pa bantu. Byo kikala.

<sup>47</sup> Abo baamba mba kechi kujipo kintu kyayewa kya yewa musango nobe—nobe bibye... Ne bantu ba mukipwilo kechi baketekela mu mingilo yabulume ne. “Amiwa saakukupa madola sauzande,” baambile mba, “mweshoko mwingilo wa bulume. Mweshoko mwingilo wa bulume!” Kyawama, abo kechi bekimwenenga ne kana kwajinga teeni sauzande abintu bya ubiwa kumeso abo ne. Kika, abo, kechi bakekimona ne.

Mwaamba mba, “Abyo kuuba byaubiwa ne.” Oo, ine, kechi byo kiji ne.

<sup>48</sup> Elaija kimye kimo wajinga ku Dotani, kabiji manzhita abena Silya ayishile ne kuzhokoloka muzhi, pakuuba mba bebasende, mambo bayukile mba popajinga—popajinga bulume bwa ntanda, bwajinga mwishayuka. Kika, aye mfumu... Umo wamwiabo waabujile mfumu wa ku Silya, kwaamba mba, “Kika, mwayuka, Elaija ngauzhi, mwina Tishibe, ye ubuula mfumu wa Isalela byo mwaambapo ku kibamba kyenu kyafyamika.”

<sup>49</sup> Waambile mba, “Yainga mukamulete! Awa ye muntu ubena kwitukanya kubula kwingila bulongo ne.” Kabiji bonse manzhita abena Silya abungulukijile ku Dotani. Bonsetu bamuzhokolokele.

<sup>50</sup> Kabiji Gehazi, awa—awa kalume wangauzhi, wabukile, kabiji waambile mba, “Oo, ba taata, manzhita onse etuzhokoloka kuno. Atweba twazhokolokwa posepose.”

<sup>51</sup> Aye waambile mba, “Kika, tuji nabavula kukila baji nabo.” Mwamona?

Kabiji Gehazi wakeketele kuzhokoloka, waambile mba, “Amiwa kechi namonapo nangwa umo ne.”

<sup>52</sup> Aye waambile mba, “Yehoba Lesa, mulabishai meso aji awe songwalume.” Kabiji meso anji alabile, kabiji tutumbatumba

tose twazhokolokeletu ba Malaika ne makalaki, Manzhita abula kumweka.

<sup>53</sup> Elaija walupukile ne kuyako, kabiji ne Baibolo waamba mba, “Aye wibampofwele meso abo.” Aye walupukile kuya kobaji; bajinga bampofu kwiaeye. Walupukile ne kwibambala mba, “Bushe mubena kukeba Elaija nyi?”

Aye waambile mba, “Ee, ye tubena kukeba.”

<sup>54</sup> Waambile mba, “Iyai kuno, ne mubuule koaji aye,” kabiji wibatwajile mukang’umbwa ng’umbwa kamanzhita, ponka pakuuba mba manzhita alupuka ne kwibatana.

<sup>55</sup> Pano, Baibolo waamba mba, “Aye wibampofwile meso.” Akyo kyaikajika byonse. Kabiji bantu baji bingi na bumpofu bwa kumupashi leelo, nangwatu Nkambo Lesa ekile mukachi kabantu ne kuubapo kintu kimo, ne bintu Aye byo alayile, abo kuuba be Kimona ne. Abo baji na bumpofu bwa kumupashi; kechi bamuyuka Lesa ne, kechi bayuka Bulume Bwanji bukatampe ne. Bino, twamona mba bekyubile kyo mu moba akwa Elaija, kabiji bakikyuba ne buji leelo. Lesa wibapuma bumpofu. Baamba leelo, mba, “Kechi kujipo mingilo yabulume ne, kechi kujipo kintu kyamusango yewo ne, abye byonse ke bya kumubijitu.”

<sup>56</sup> Kabiji baambile kintu kimo ne pe Elaija, mambo byo atwajilwe mwiulu ne Elisha wapinga pa kifulo kyanji, songwalumetu, wayikele na kipala, mwanyiketu, baana bamulondejile panyuma yaji, ne kumwambila mba, “Mukote wakipala, kika kyo wabujiile kuya ne Elaija?” Monai, abo kechi bekiswile ne Kwikiswa ne kufumatu ku tendekelo, bantu, panyuma yakubiwa bintu byavula bingi. Kabiji awe muntu mu katampe wa Lesa byo atutulwilwe kuya Mwiulu mu kalaki wa mujilo, nangwa byokabyo bantu kechi Bekiswile ne. Kabiji baana babo bamulondejilenga lubilo awe muntu ne kwaamba mba, “Mukote wakipala, kika kyo wabujila kuya mwiulu?” Mwamona? Kabiji ne ngauzhi wafingile baana, ne mbeyala wamukazhi waipaile foote-tuu ba mwiabo.

<sup>57</sup> Pano monai. Leelo, byonka byokyajinga mu kyokya kimye, babikileko nondolwelo yabo abobene ku Kyambo. Pakuuba, inge bakeba kuuba kyokyo, akyo kiji koobaji bene, bino beseka kuuba mba atweba twikitabile. Aye Baibolo waamba mba, “Akye Kyambo kya Lesa kechi kiji nandondolwelo ya muntu bunke bwaji ne.” Lesa uji nandondolwelo Yanji Ayemwine. Lesa ushiniikisha Kyambo Kyaji, kabiji aako kokulondolola Kwakyo. Byonka byo Ng’amba bimye byavula, Aye waambile muntendekelo mba, “Kwikale kyeya,” kabiji kwajinga kyeya. Akyo kechi kikebewa kwi kilondolola ne; kyamwekele. Aye waambile mba, “Kisungu ukemita,” wayimichile. Aye waambile mba Ukoba “uketulwila Mupashi Waji,” Wi kyubile. Kabiji Waambile mba, “mumoba akumpelo,” bintu Aye byo akooba,

kabiji Aye ubena kwibyuba! Kechi kikebewa kulondololwa ne; Lesa ubena kulondolola Aye Mwine. Nangwatu muntu wabula maana waamba, akyo kechi kikanya Lesa nangwatu pacheche ne.

<sup>58</sup> Kimye Yesu kyo ajinga pantanda, Aye wajinga na bumbulwa luketekelo bwavula bwa kulwa nabo byonka byotuji nabo leelo, kape ne kukilapotu. Bino kechi kyamukanyishe Aye ne; Aye wailengatu na kwingila kabiji ne kuuba mwingilo Waji, kabiji ne Lesa washiniikishenga byonsetu Aye byo aubilenga. Aye waambile mba, “Amiwa kechi Jibunke ne. Ba Taata ne Amiwa twi umo; Aye waikala mwi Amiwa. Kechi Amiwa yami nyingila mingilo ne, ke Bataata baikala mwi Amiwa. Kabiji inge Nabula kwingila mingilo Yanji, nanchi kungitabila Amiwa ne; bino inge Nguba mingilo ne anweba kungitabila Amiwa ne, nanchi itabilaikotu mingilo.” Mwamona? Mubyambo bikwabo, abo. . . “Kebakebai Binembelo,” Aye waambile mba, “mambo imo momulanguluka mba muji Bumi Bwapee, monka mukuyuka Binembelo. Kabiji Binembelo, Abyobine, byo binshimuna Amiwa.” Amena! Ngaayo ng’ambilo! “Abyo ibyo, abyo Binembelo, byo bimubuula Yami Ng’anyi,” byo aambile Yesu.

<sup>59</sup> Kabiji ke Binembelo bimubuula kimye kyo tubena kwikalamo. Kabiji bintu byo mumona kubiwa, ke Lesa Ayemwine mukachi kabantu Banji. Kapaji wakonsha kusangula bafwa ne kanatu Lesa. Kapaji wakonsha kuuba bintu Aye byo abena kuba ne kanatu Aye. Mambo aye Baibolo waamba mba, “Aye ye umotu keesha, leelo, ne myaka yonse.”

<sup>60</sup> Pano twamona musango wangubilo ya katataka ya bantu, nanchi, “Oo, moba apita, kechi kujipo kyakuuba mba mingilo ya bulume ne. Bonse bantu bajitu na ng’umvwino ya kumubiji.”

<sup>61</sup> Telekai kuyewa Elaija, ngauzhi, byo ebajinjilenga ne bafunda masukuulu abyambo bya lesa. Monai, monai, aye waambilenga nobe iye Lesa Mwine. Elaija waambilenga nobe iye Lesa Mwine, “Kechi kukekala kime kufuma mwiulu ne poso na jiwi Jami.” Amena! Ee, mwane.

<sup>62</sup> Aye ngauzhi wabaajile bingi mu Kyeenyi kya kwa Lesa, bangauzhi ba mu Lulayang’ano Lwakala, nangwatu kimye kyonse, inge baikala Mukyeenyi kya kwa Lesa posotu baikala ke Kyambo, Mbila yabo ke Kyambo Akyokine. Kabiji, vulukayi, aye waambile mba, “ABYO BYOBYAAMBWA AYE NKAMBO.” Kabiji aba banabalume byo bajinga nayoya mbila kufuma kwi Lesa, kabiji bapombelwe kyakuuba mba milanguluko yabo. . . Kape kyajinga kyapusana na milanguluko yabo, abo kape kechi bekimwene kwikala kya—kya oloka ne. Bino baambilenga Kyambo kya Lesa, “ABYO BYOBYAAMBWA AYE NKAMBO.”

<sup>63</sup> “Kechi kukekalapo mvula ne poso Najiwi jami.” Oo, ng’anyi ng’ambilo! Aye wajinga Mukyeenyi kya kwa Lesa kabiji

kyajinga kya shiniikishiwa bingi bulongo. Kabiji, vulukai, akyo kyalondela Amos 3:7, “Aye Yehoba Lesa kechi ukobapo kintu ne kana patanshi Wikisolwela jimo ku bakalume Banji bangauzhi.” Waambile mba, “Kechi kukekalapo mvula ne!” Aye patanshi. . .

<sup>64</sup> Abo bamusekelenga, bamwenenga nobe wakonya, “Abo ke busengwe!” Bino, monai, aye wajinga na ABYO BYOBYAAMBA AYE NKAMBO amba kechi ikanonka ne. Kabiji, Lesa, saka akyangye kuuba kyokyo ne, Aye wikisolwejile jimo kwi Elaija kalume Wanji. Kabiji aye washinikishiwe, ngauzhi washinikishiwa, nanchi bantu bafwayijilwe kulapila. Bino, mukifulo kyakyokyo, bamusekele, ne kwaamba mba, “Oo, tuji na mvula yavula bingi! Amwa mwakusungila meema mwayula. Mikola nayo meema abena kupita bingi bulongo.”

<sup>65</sup> Aye Baibolo waambile mba, “Kechi kwajingapo nangwa kime pa myaka isatu ne bang’ondo sikisi.” Tukola tonse ne meema aumine, konse konse. Akyo kechi kyajinga awa muntu ne, awo wajinga Lesa kwaamba kupichila mu muntu. Awa wajinga aye “Amiwa” byo kyajinga. Atweba kimye kyonse twayuka. Nanchi aye. . .

<sup>66</sup> Twatana kuuba mba umvwe muntu wayiya, watumwa na Lesa, watongwela jimo na Lesa, na bukine bwa ABYO BYOBYAAMBA AYE NKAMBO, mbila ne muluwe bajitu pamo kabiji musangotu umo. Mambo aye watumwa kwimenako ABYO BYOBYAAMBA AYE NKAMBO, Kyambo pa Kyambo, nanchi aye ne mbila yanji banjitu pamo.

<sup>67</sup> Muntu wa ki dinominesheni watumwa na dinominesheni, aye ne kipwilo ke “umotu.” Wafunda byambo bya lesa ku masukuulu abyambo bya lesa, walengwa na dinominesheni imo, aye ne mbila yanji bajitu pamo; kipwilo kya masukuulu abyambo bya lesa, wibifunda. Kijitu bulongo.

<sup>68</sup> Pano inge muntu waiya na ABYO BYOBYAAMBA AYE NKAMBO, aye ne Mbila ke umotu. Kabiji Elaija byo aishile na ABYO BYOBYAAMBA AYE NKAMBO, aye ne mbila yanji baiketletu ke umo. Byonka byajinga Yesu, Aye byo aishile, Aye wajinga Kyambo, Yoano Wazhila 1. Nanchi Kyambo kya Lesa ne muluwe wa yoyo nkulo bajingatatu kyo kintutu kimo, kimye kyonse. Abyo ibyo.

<sup>69</sup> Yesu wajinga Kyambo akya kyaawilwe. Aye wajinga byo baambilenga bangauzhi amba byo kikekala, “Kisungu ukemita ne kusema Mwaana.” Kunyuma kwine kutendekelo, Lesa wibabujile, kwaamba mba, “Awa Lukunwa wa mwanamukazhi ukafumpa mutwe wa muloolo, kabiji neaye ukafumpa kashiko kanji.” Abye byonse bya bungauzhi bya painwe. Davida kujila, bonse bangauzhi kupita mu mankulo, kwambatu pe Aye. Aye wajinga kyokya Kyambo kyasololwa! Aleluya!

<sup>70</sup> Pano mwamona Nkombena kwi mutwala nyi? Najikwamba nenu bulongo bingi luno lukeelo. Kechi mubena kumona sambu

ya Lesa mumi mu Kipwilo kyumi nenyi, aye Musongwa? Abo bakolwa batambula lubuko, bafwa babena kusanguka, bilema bibena kwenda, bampofu babena kumona, Mamboawama abena kuyatu kulutwe mubulume Bwao, mambo Mbila ne Muluwe bajitu kimo. Akye Kyambo kiji mu Kipwilo, mu muntu.

<sup>71</sup> Akyo Kyambo kya kwa Lesa kyajinga mwi Elaija byo ayile kookwa na ABYO BYOBYAAMBA AYE NKAMBO, kabiji waambile mba, “Kechi ikanonka ne.” Awa kechi wajinga Elaija ne; awa wajinga Lesa mwi Elaija.

<sup>72</sup> Naamba bimye byavula bingi, nobe inetu wa Sayaasi wa Benakilishitu awo wambujile kimye kimo. Nekyaamba bimye byavula. Awa mwanamukazhi waambile mba, “Mr. Branham, waamba bingi javula pe Yesu.”

Naambile mba, “Naketekela mba kyo kintutu kyonka kyo Nakonsha kutambwilapo mukumbu.”

Kabiji aye waambile mba, “Obewa weseka kumubika Aye mu Bulesa.”

Naambile mba, “Aye wajinga Bulesa.”

<sup>73</sup> Waambile mba, “Oo, Aye wajingatu ngauzhi, Aye wajinga muntu wawama, bino Aye kechi wajinga Bulesa.”

<sup>74</sup> Kabiji Naambile mba, “Kyawama, mweshaipo kimo Kinembelo akyo kyaamba mba Aye kechi byo ajinga ne.”

<sup>75</sup> Aye waambile mba, “Mu Buuku wa kwa Yoano Wazhila, waamba mba Aye ‘wajijile’ byo Ayile ku kilende kyakwa Lazalaza.”

<sup>76</sup> “Kyawama,” Naambile namba, “kine, Aye wajijile. Aye wajinga na lubaji lonse lubiji bumuntu ne Bulesa. Aye wajinga muntu, kujila; bino Aye wafwajilwe kwikala Lesa pakuuba mba asangule wafwa.” Ibyo. Naambile mba, “Aye wajinga muntu, nzala; bino Aye wajinga Lesa pakujisha bantu faivi sauzande, kufumatu ku mabbisiketi acheche ne masabi faivi.” Abye ibyo. “Aye wajinga muntu, kulala kunyuma ya bwato; bino wajinga Lesa mwi Aye awo wazhindamikile meema.” Mamboka? Aye ne Mbila Yanji bajingatu umo.

<sup>77</sup> Aye waambile mba, “Amiwa ne Ba Taata twiumo. Ba Taata bekala mwi Amiwa.” Aye wajinga kuyula konse kwa Bulesa mu mubiji.

<sup>78</sup> Naketekela kyajinga bingi kitukwata mujuba jikwabo, kimye kyo Nasapwijilenga *Mankulo Abipwilo Bitanu Na Abiji*. Kyakutatwilapotu, Ami—Ami kechi namuyukile Yesu mba ye waimana popa na . . . na kitoka peulu Yanji byobya, naambile mba, “suki Yanji yajinga itoka nobe booya.” Nakakelwe kumvwa muntu wa myaka saate-fiili wakonsha kwikala nasino utoka.

<sup>79</sup> Nayichile wawama wafunda masukuulu abyambo bya lesa, Pentekosito wafunda masukuulu abyambo bya lesa, mulunda

mutemwe wawama. Kyawama, wajinga Mulongo Jack Moore. Aye wamaana, muntu wajimuka. Aye waambile mba, “Mulongo Branham, awa wajinga Yesu watumbijikwa. Abya byo Yajinga mwekelo yanji panyuma ya kutumbijikwa Aye.” Ine, kechi Nakonsha kuswa kyokyo ne. Ine.

Na—Na—Naambile mba, “Kyawama, Mulongo Moore, nakusachila.”

<sup>80</sup> Naikele mu kibamba moomwa ne kwisamba na Lesa. Napitulukile mu buuku wabukwasho kumutwala Aye kunyuma kwi Danyeale, apo po kyaamba mba, “Kabiji aye wafikile ku Mwine Wakala suki Yanji yajinga yatoka nobe sino.” Naambile mba, “Nkambo, Ami—Ami—Ami kechi nayuka kyakwaamba ne, kabiji Njina mwingilo.” Bino, akya kyajinga saka tu- . . . kabiji vulukai, Tutetesho Tutanu natubiji saka tukiyangete kushinkulwa, peepi nobe mwaka umo nangwa kukilapo, kunyuma. Nalombelenga kookwa, “Nkambo, kyo kika kye?”

<sup>81</sup> Kabiji Natajile, kwimana kumeso ami, kabiji pa imene muntu kabiji aye wajinga mutonyi, kabiji aye wawajile kisochi kitoka. Ba mitonyi bakala ba mukimye kyakala abo bavwalanga kisochi kitoka kumweshwa amba aye uji na nsambu yapelako.

<sup>82</sup> Kabiji byo Namwene Yesu na kisochi kitoka, Naambile namba akye kishiniikishatu bukine botwayuka, amba Aye lo Luusa Lwapelako. Lesa wamwesheshe kintu kimo pa Mutumba Wakwalulwa, waambile mba, “Awe ye Mwaana Wami ye natemwa, mumvwayi Aye, ye Luusa Lwapelako!”

<sup>83</sup> Kabiji kubwela kunyuma akwa kuntendekelo ya Tutetesho Tutanu natubiji, kimye aba Bamalaika batanu nabaji po bayishile muyewa musango wamilamenda, bayimene poopa ne nkumbula kubwela kuno kabiji ne kwaamba pa totwa Tutetesho Tutanu natubiji, kabiji amba Aye ukekala ne amiwa, Aye ukamweshwa byobiji, abya bintu byalubakene. Amiwa kimye kyonse nalangulukilenga mba bya shinkilwa na tutetesho kunyuma ya Buuku kabiji amba ke bintu byabulwa kunembwa mu Buuku, bino kyayishile kumweka byo byasolwelwe amba Aye kuuba wauba kyokyo ne. Kechi ke kintu kyanembwa mu Buuku ne . . . Ke kintu kyafiiwa mukachi ka Buuku. “Pakuuba yense ukafumyako Kyambo kimo kwi Akyo nangwa kunungako kyambo kimo kwi Akyo ne . . .” Nanchi ke kyafyamika akyo kyafyamikile mu Buuku mu mankulo abipwilo bitanu nabibiji. Kamo kaato kaletete kya—kya fyamika, byonse pa lubatizhilo lwa mu meema ne bintu bikwabo abyo bibalubankenye mukimye kyalepa bingi.

<sup>84</sup> Kabiji aba byo bayile mwiulu, bitanjilo bikatampe bya ku California, kufikatu ne ku Mexico, kuya ne Tucson, konse konse, bakompelenga bipikichala Byakyo. Yajinga mwekelo ya bukyafyamika. Mulongo Fred Sothmann poopa, waikala kunyuma kookwa, kabiji Amiwa ne Mulongo Gene Norman,

saatwaimana ponkapa byo Bailenge mwiulu. Abo bakompele kipikichala, nangwa byokabyo kechi bakiyuka byokiji ne. Kuno kimye kimo kunyuma, bantu bonse baambilenga mba, “Talai kuno. Akye kimweka nobe *bibye*, kabiji ne abyo byapi bya Bamalaika, byo bivungile byobya.”

<sup>85</sup> Juba jimo, pa kwikizhookolasha ku kilujo, kutalapo, apa pajinga Yesu Kilishitu bulongotu byonka Hofmann byo amulengele Aye. Waimene poopa saavwala kisochi kitoka, na kutala pano pashi, saabena kumweshwa mba Aye uji Luusa Lwakilapo. Ao Meulu ekimweshwa, aye Baibolo wikimweshwa, ayo Mbila yikimweshwa, byonse pamotu. Luusa Lukatampe, wawwala kisochi kitoka; mumona myevu Yanji ifita mushi. Bavula mwianweba mwikimona kipikicha. Tuji nakyo kunyuma akwa. Kizhalulwilaitu ku kilujo, mu mbaji, ne kutalapo. Apa Aye poaji, bulongotu byonka byo kyajinga, inge Aye ba mukompa. Abo bekimwena kulubaji lungi. Anweba mwafwainwa kwi kimwena ku lubaji lwa kilujo. Kabiji kanatu Nkambo Lesa ye wakonsha kusolola lubaji luji bulongo lwepi. Kyalulwilai kulubaji lwa kilujo ne kutalapo. Abyo Aye byoaji, byonka byo ajitu inge bekikopele, kokwa.

<sup>86</sup> Akye kimye kitanshi kyo Namumwene Aye, Wamwekele nobe *Mutwe wa...* Hofmann. Amiwa kechi ne kimwenepo kala ne. Kabiji mu tambanako wakwa Billy Sunday, myaka palutwe, Nekimwene. Yami nzubo kechi ibulwa kikye kipikichala kufumatu ku kyokakya kimye ne.

<sup>87</sup> Nanchi, kuno mwiulu, naambile mba yeka Lesa umo ye Namwene mu kimwesho kuno, nsajitu songwalume muheche ponka paji aye nzubo ya sukuulu, Aye wamwekele musango umo. Kabiji kuno mu Meulu, pa myaka saate-fiili kulutwe, wikimweshwa, amba akye kya bukine. Awa ye musango Aye ye amwekelamo; kechi kintu kya kufwanyikizhatu kya mumilanguluko ya muntu ne.

<sup>88</sup> Nobo mu Vatican, banji na—na—na Kilishitu ye balenga kookwa, uji na kizhingu kicheche kya myevu itoka nangwa kizhingu kya myevu ku mubanga Wanji, yalepa nobe kichika kya ichi umo, ao yazhookolokatu ku kyatunwa Kyanji nobe *bibye*, ne kutela kyokya mba ye Kilishitu.

<sup>89</sup> Akyo kyandetela kumilanguluko yami ya sendwe upeeta waki Ngiliki ye namwene kimye kimo munzubo yakala yabupopweshi, kibena kumweshwa Adama ne Eva byo bamwekanga; ba mwekelenga nobe banyama nangwa kintu kimo. Abyo milanguluko ya buntushi imo byo ilanguluka pa bintu bya bumupashi. Nalanguluka mba Adama wajinga muntu umo walamba bingi kukila pa bantu bonse, kabiji Eva wajinga mwanamukazhi walumbuluka mu musango uji yense.

<sup>90</sup> Pano milanguluko ya buntushi yikibika akya Kintu mumilanguluko yabo bene, nanchi Lesa utuma ne kwikisolola



akya Kintu mu Bulume Bwanji. Akyo kine kyo kyamwekele mu moba akwa Ahaba.

<sup>91</sup> Bino, twamona mba Elaija wakonsheshe kwaamba byobyo mambo aya Mbila ya kimye ne Kyambo kya kwa Lesa, nangwa, aye muluwe, aya Mbila—aya Mbila, ne Kyambo, kyajingatu kintu kimo. Aye ngauzhi, akyo Kyambo, aya Mbila; muluwe, Mbila, ne Mbila, byajingatu kimo. Yesu waambile mba, “Inge kechi Nyingila mingilo ayo ya Nembelwa ne, nanchi kungitabila Ami ne.” Akyo kyawama. Muntu uji yense ne mbila yanji bekalatu ke umo.

<sup>92</sup> Ao oene mambo leelo kechi baketekela mu kuuba mingilo yakwa Lesa ne, mambo kechi baswa Mbila yakwa Lesa ne. Abo kechi baitabila Mbila ne.

<sup>93</sup> Pakuuba aba baketekela kimye kya kwa Lesa kyo tubena kwikalamo, abye bintu ke Kanjo kafyamika. Pano ngilangulukaitu, Lesa Wikifya bingi kya kuuba mba umvwe batalapo pe Akyo kabiji kechi bakonsha Kwikimona ne. Jishindatu jimo ajo Elaija jo ampofwejilemo meso anzhita ya Benasilya. Mujishindatu jimo ajo Lesa jo ampofwelamo wabula kwitabila ku Kajo kakine ka mwaana, awa waitabila.

<sup>94</sup> Byo ba mutelenga Nowa amba, “wa konya,” kunshimika bwato, meso anji ashinkukile ku Kyambo kya Lesa ne kumulaye. Akya kyoka kyo batelelenga mba bukonye, kya pulwishe Nowa ne kisemi kyanji. Monai, kintutu kimo. Kyoka kintu kyo baseka bantu, kyo kintu kyo tulombelelako. Kyoka kintu kyo batela mba “bukonye,” atweba twikitela mba “Kikatampe!” Ntanda kyo batela mba “kikatampe,” Lesa wikitela mba “mwabula maana.” Kabiji ntanda kyo batela mba “mwabula maana,” Lesa wikitela mba “Kikatampe!” Kijitu kyapusenamo pakachi ka kiji Bulongo ne kyaya mungi. Yesu Kilishitu ujitu pamo keesha, leelo, ne myaka yonse.

<sup>95</sup> Vulukai, aye waile mumpuzha yanji yafyamika mwaila lunengezho lwa kwa Lesa, kulwito lwakwa Lesa, ne ku Kyambo kya Lesa. Elaija watwelele mumpuzha mwanji mwafyamika mwayijile kuyukila jimo kwa kwa Lesa, lunengezho, ne kwita pa bumi bwanji, monka mwayijile Kyambo. Inge amo kechi motwatwelejilemo ne, Amiwa kechi nayuka byo twakonsha kutwelamo ne.

<sup>96</sup> Kabiji monai, kyaashi sakakikyanyeye kutampa, Elaija waile mu iye mpuzha ya bufyafya namambo abumi bwaji. Ke kipasha kya kuuba mba luzhachisho sakalukyanyeye kufika pa ntanda, akyo Kipwilo nishi kyayitwa kala, Musongwa aye wasalalulwa kala, kabiji ubena kupembelelatu luzhachisho sakalukyanyeye kufika ne. Ubona kupembelela kala, kuja Kanjo kakwa Lesa, na kumvwa buwame bwa mapesho akwa Lesa. Muntu yense uji namilanguluko yawama wayuka mba tubena kuya kala, twafika mu kimye kya luzhachisho.

97 Talai! Mulongo Banks, anweba bantu bavula muji muno bufuku buno, wayimene popa pa mutumba alwa lukeelo.

98 Kabiji Nasaka kwamba pa yewa mutumba, Mulungu wiya lukeelo keelo, inge Nkambo waswa. Njina lumwekesho lukatampe, kintu kyaya palutwe kechi Nakonsha kwikilama kwa kubula kwi kibulang'ana bufuku buno ne. Bino Njina. . . Mwamona? Kabiji kitwajijilatu, kimye kyonse, kintu kimo kyamweka palondela kikwabo. Mwamona? Kechi kikaleka kumweka ne, mambo kyajinga ABYO BYOBYAAMBA AYE NKAMBO.

99 Anweba bonse muno, masauzande a masauzande baji pa tepu, bang'umvwine kwimana ne kwaamba mba, "ABYO BYOBYAAMBA AYE NKAMBO, kikekala *bibye* ne *bibye*." Kabiji ne mapela abyambo ne magazini amajashi bya mwesha mba byobyoyo kiji. Abo kechi bayuka kana kyo kika ne, bino be kimona. Abo kechi bayuka byokiji ne, bino be kimona, kulengela Kyambo kwikala kya bukine.

100 Twaimene kookwa ku mukola, awa Malaika wa Nkambo waishile joja juba, myaka saate-fiili, nangwa, kyajinga mu 1933, waishile ne kwaamba bintu abyoye Aye byo aubile. Walupukile, kabiji ne bantu bavula baimene ku kitulu, ne kwaamba mba, "Akya kya kulumbululaka, Billy?"

101 Naambile namba, "Akyo kechi kyajinga kyami ne; kyajinga kyenu. Naketekela; kechi mwayuka ne." Kabiji batwajijiletu nakwenda.

102 Pano ba kafunga bang'ambijile, baambile mba, "Mwalumbulula kuuba mba anweba, nakufunda kwa muguleedi-seebeni, ukaya pantanda ponse na kulombelela bamamfumu ba kisemwa ne babinemanga kabiji ne bamamfumu? Kabiji, oo," waambile mba, "Kilubaikotu!"

103 Amiwa kechi ne Kilubako ne, Kyanembelwe pa muchima wami. Bino pano, myaka saate-fiili kulutwe, byonsetu byo aambile Aye bya fikizhiwa bulongotu Monka moebyambijile Aye amba ukebyuba. Aye ke Lesa kechi wakonsha kukakalwa ne. Aye kimye kyonse ulama Kyambo Kyanji. Aye. . . Kechi wi Kizhinauka ne.

104 Pano, monai, aye waile mulunengezho lwa Lesa (kuyukilajimo), lwito lwa Lesa, kabiji ne Kyambo kya kwa Lesa, kabiji wakatwelelemo kyaashi saka kikyanyge kwiya.

Pano, twayuka mba luzhachisho luji peepi kufika.

105 Nsatwaimana pa katumbatumba aja juba, Mulongo Banks Wood saamana papo, twatutukilenga ku katumbatumba. Kapapo Nkyambule nejikwabo, pakuuba mba lwitabilo lwenu lunshimikwe namambo amilombelo ayo ibena kwiya peepi nobe teeni, mamineti fifitiini. Naendelengatu palutwe ya kwa Mulongo Banks. Aye wajinga. . . Naketekela washile

Nyenga Ruby nishi wakolwa. Kabiji aye waishilenga panyuma yami, Namwene kilungi kyanji, kichila. Natajile kunyuma. Nalangulukile mba katumbatumba kamukosela kwikakanjila, nanchi Natatwile kwenda bitende bitende. Amwa monka mu kiselebwa, monka mumitumba nobe *byobya*, ponka pamwekejile Bamalaika ba Nkambo. Twaijilenga monkamwa, apo po Bamwekejile bang'ondo bacheche bapita kunyuma.

<sup>106</sup> Kabiji byo Nailenga nakukajila katumbatumba, aye Mupashi wa Lesa...Byo Nazhookolokele, kutala peulu ya mutumba, Aye waambile mba, "Tola aja jibwe, ne kumwambila mba, 'ABYO BYOBYAAMBA AYE NKAMBO, musakumona Lukumo lwa Lesa mu bimye bicheche bibena kwiya palutwe.'"

<sup>107</sup> Natoleletu jibwe, ne kwaamba mba, "Mulongo Banks, Amiwa kechi nayuka ene mambo ne," nejitaile mu mwela, kabiji Naambile mba, "ABYO BYOBYAAMBA AYE NKAMBO, musakumona Lukumo lwa Lesa."

Aye waambile mba, "Akyo kyalumbulula Ruby?"

<sup>108</sup> Naambile mba, "Ine, kechi Naketekela mba kyalamata kwi obewa ne, Banks nangwa Ruby, nangwa umotu ne. Nalanguluka namba Kibena kwaamba, 'BYO BYAAMBA AYE NKAMBO, kintu kimo kisakumweka.'"

<sup>109</sup> Kabiji lukeelo lwalondejilepo byo twaimene kookwa, bantu bavula, kechi Nayuka kana muji baanga baikala muno ne, amwa mwajinga twelufu nangwa footini, fifitiini ba mwiataweba baikele pooa. Ponkapotu, wa mwingilo waishile kwi amiwa ne kwaamba mba, "Mulongo Branham," waambil mba, "jizhina jami ne *Kananga-ne-kananga*." Waambile mba, "Najinga umo waboba balipijile nyingijilo yobe mu California."

<sup>110</sup> Naambile mba, "Naumvwa lusekelo pakusambakana nobe, mwane." Douglas McHughes. Aye waambile mba, "Amiwa..." Naambile mba, "Njina lusekelo pakusambakana ne obewa." Wapakene nanji maboko.

<sup>111</sup> Aye waambile mba, "Kyawama, pano, Nakeba kwipuzha jipuzho." Waambile mba...Roy Roberson, waketekelwa muno; Mulongo Wood, Terry ne Billy, kabiji, oo, Mulongo Mc Anally, kabiji kechi Nayuka bonse baimene popa ne. Kabiji Na... Aye waambile mba, "Nasaka kwi mwipuzhapo kintu kimo." Aye waambile mba, "Bushe Nkambo ukupa bimwesho muyuwe musango nyi?"

<sup>112</sup> Naambile mba, "Ee, mulongo, bino Naiya kuno pakuuba mba fumemo mubibye, amba kokolokepo."

Kabiji Nakeketele kuzhookoloka *bibye*, kabiji Namwene dokotala wabaya ubena kumutala, waambile mba, "Rev. McHughes, alwe lukatazho mu jiso jobe lukalengela jiso jobe kufumamo. Nayingijilapo pe obewa pa myaka ibiji, kabiji kafwako kikwabo kyo Nakonsha kuba pa kikyene ne."

Kabiji Naalulukijile kwi aye. Naambile mba, “Kika kyo wangipwizha kyokyo, dokotala obe wakubujile, juba jikwabo, ‘Alwa lukatazho lwajinga mu jiso jobe.’” Kyajinga pakachi kajuba, peepi nobe leveni koloko, kabiji wavwajile magalasi amute. Naambile mba, “Ene mambo; kechi wavwajila juba ne, ke mambo ajiso jobe. Aye wakubujile mba ‘jikonaika jiso jobe.’”

Kabiji watatwile kujila, waambile mba, “Abyo ibyo.”

<sup>113</sup> Naalulukile ne kwendauka jibiji, najinga na fosholo mu maboko ami. Kabiji Natajile; Namumwene saka aimana nakutala kwi amiwa, meso anji ajingatu atoka bulongo. Naambile mba, “Bino ABYO BYOBYAAMBA AYE NKAMBO, jiso jobe kechi jikafumamo ne.” Naile nanji mungye nakwipaya nyama mukimye kya kisalo, aye wakonsha kumona bingi bulongo kukila ne amiwa kabiji ne muntu yense uji mujibuumba. Aye kechi . . .

<sup>114</sup> Kbiji Namwene inetu mukulupe wabwezha pashi sokoshi yanji ne kusutula lubaji lwa siketi. Mwanamukazhi waambile mba, “Mwaanami, inge wamona Mulongo Branham, ukamubule akalombebele kulu kwami.” Kabiji Natajile pashi popa, ne tucheche . . . twamwekele nobe bitumbwatumbwa biju ku mauulu anji, kuzhookoloka.

<sup>115</sup> Naambile mba, “Bainobe ke inetu uji na mutwe-watokoloka. ‘Obe mwaanami,’ wamona. Wakubujile saka ukyangye kufumako, inge wamona amiwa, amba nkalombebele mauulu anji. Aye uji na tubitumbwatumbwa, nobe, twamena ku mauulu anji.” Waubiletu nobe ubena kukeba kupungila.

Waambile mba, “Abo bukine.”

Naambile mba, “Mubulai mba kusakamana ne. Kisakwikalatu bulongo.”

<sup>116</sup> Natatwile kwenda ukuzhookoloka. Pano popo Naumvwine Jiwi ja Lesa jaambile, waambile mba, “Fumamo mujishinda, bukiji bukiji.”

Roy Roberson saka aimana byo byo, nayukile namba awe wapita mu makondo, Nabikile kuboko kwami pa kipuzhi kyanji, Naambile mba, “Mulongo Roy, fyama, bukiji bukijitu!”

Waambile mba, “Lukatazho lujipi?”

Naambile namba, “Fuma mujishinda! Fyama!”

<sup>117</sup> Kabiji natatwiletu kwenda ukuzhookoloka, nabika fosholo wami pashi, naaluluka, na vula kisochi kyami. Kabiji Aye keeye, Lukumo lwa kwa Lesa lwayikijile mu kazhimbiji lwa lajile lubaji lumo lwa mutumba byokabya, kabiji kyajijile ne kusukenya mpuzha byokabya, kuchibaula peulu yabipupu; peepi nobe fiili nangwa foolo, mafiti faivi peulu ya mutwe wami. Kyabwelele panyuma nobe ka mufolo byo bya; Kya jijile jibiji. Kabiji, Ke kiiye, jisatu.

118 Pano byo Kyaile, jabusatu, Mulongo Banks wayishile, ne kwaamba mba, “Akyo kyo mwajikwambangapo nyi?”

Naambile namba, “Ee.”

Waambile mba, “Kyajinga kika?”

119 Naambile mba, “Lesu umweka mu tuzhimbiji.” Ami kechi nayukile ne kana Aye wakebelenga mba mbuule bantu nangwane.

120 Nanchi Nayile ne kulombako pacheche. Nanchi Aye waambujile mba ne Babuule. Naambile mba, “Ke luzhachisho lwafikila ku Kitulu kya Kumuzhika.” Mutalai leelo! Talai kyamwekele ma awala achechetu panyuma yakyokyo: Alaska watwelele pashi. Kabiji pano kyonsetu kibena kuya pashi. Tubena kutwela mu luzhachisho. Lusa lwapita.

121 Bino sante ekale kwi Lesu, tuji na Kanjo kafiiwa, Kanjo ka bumupashi, kya kuuba mba tubena kwikela ku buwame nelusa lwalumwekesho lwa Yesu Kilishitu mu ano moba akumpelo, kwi shininkisha Ayemwine mukachi ka bantu Banji. Amena! Batwelele mukachi. Elaija watwelele mukachi kyaashi saka kikyanyge kufika. Sante kwi Lesu pa kutwelamo luzhachisho saka lukyanyge kufika. Bino kino ke kimye kya kulupuka ne kutwela, kufumamo mu tootwa tubungwe ne kutwela mwi Kilishitu, kimye-kyakulupukamo ne kimye-kyakutwela kubonse baitabila kyakine.

122 Nanchi aye waichilwe, kabiji waikela monkamwa. Vulukai, aye kechi wafumineko ku kakola ne posotu Lesu byo amwichile.

123 Kabiji peepi na kupwa kwa kyaashi, Aye wamwichile kufumako, kuya kunzubo ya kituzhi. Monai, Aye wamwiichile ku kituzhi. Kabiji awe kituzhi kechi wimvwangilepo aye mwine na babula kwitabila ne; kutambula kiyukilo kya lukinyama mukimye kya kyaashi. Nanchi Aye wamwiichile kufumako. . . waichile Elaija kuuba mba alame awe kituzhi. Abo bajingatu na kashinkwa kacheche, kakitutu kamo ko akwachijile. Kabiji Elaija waambile mba, “Mpai amiwa, patanshi. Mambo, AYO BYOBYAAMBA AYE NKAMBO, awa mulondo kechi mukapwa ne nangwa mubotolo kechi mukoma ne, poso juba aye Yehoba Lesu jo akatuma mvula panopantanda.” Kutangizhako Lesu patanshi, Kyambo Kyanji patanshi!

124 Monai, mwajinga tubunga mu mulondo. Kimye kyonse kyo ayile nakukeba bunga, mwajinga bunga mu mulondo. Mwajinga manyi mu botolo, kimye kyonse kyo ayile na kwi akeba. Kika? Bunga bwayimejileko Kilishitu mu kitapisho-kyabunga. Mukono waesekejiletu pamo, mukupela bonsetu. Yonsetu mukono wa bunga wajingatu pamo, kumwasha mba Aye ye umotu keesha, leelo, ne myaka yonse. Akya kyajinga Kyambo, aye Shinkwa wa Bumi ulondela mbila, mu kushininkisha Kyambo.

<sup>125</sup> Nanchi byobyo kiji ne leelo, balunda. Nanchi byobyo kiji ne leelo, amba awa Shinkwa wa Bumi ye bajile baana, walondela Mbila ya kwa Lesa, pakuuba mba balamiwe mukimye kya kyaashi. Ibyepi umvwe Aye waimana mukyeenyi kyetu buleelo? Ibyepi umvwe Aye waimana mu kyeenyi kyetu ponka pano? Aye wakonsha kuuba ne kwingila nobe byonka Aye byo aingijile mu moba byo Ajinga mu mubiji pano pantanda. Aye Musongwa ke lubaji lwa Mulume, Kipwilo kijitu pamo nobe Kilishitu. "Ayo mingilo yo Nyingila ne anweba mukeyuba." Kabiji ke Kyambo kya yingijile. Aye witubuujiile mba bintu byo Aubilepo ne atweba twakonsha kwibyuba.

<sup>126</sup> Twamona papo ne jikwabo, inge Kyambo kiji mwiatweba kabiji kyaiya mwi atweba, byonka Byo kyaubile pe Elaija mu joja juba, Kikooba kintu kyo kyo aubilepo, aye ukaja pa byafyamika Bintu bya kwa Lesa abyo byafiwa kuntanda. Oo! Nejikwabo, kilengela Mbila ne muluwe ke umu. Ako Kanjo ka bumupashi kanengezhiwa, kabiji Kanji mu kino kimye. Kabiji uji yense mwi anweba wafwainwa kwikala na kaako Kanjo inge ubena Kwikakeba, inge mubena kukeba kufumako ku bumbulwa lwitabilo bwa kino kimye, inge winengezha kwiiya mwi Kilishitu, kwiiya mu mulaye Wanji.

Kabiji vulukai milaye Yanji, mu Malakai 4, Luka 17:30, ne mu Yoano Wazhila 14:12, kabiji byavula bikwabo Binembelo, kubulang'ana mba, Yoela 2:38, kabiji ne byonse byo Akooba, nangwa 2:28, byokabyo, Aye byo akoba mu moba akumpelo. Kabiji ne ngauzhi bo aambile mba kukekala Kyeya mu moba apelako, ne byo Kikengila, ne byo Kikekala, byonse Binembelo bibena kutongolatu ku ano moba apelako. Kabiji awo ye Kilishitu! Inge mwakonsha kufyama mu Kyokyo pano, mu yoya Mpuzha ya bufyaafya, mwakonsha kuja ne kumona buwame ne lusa lwa kwa Lesa. Inge wakolwa, kuji lubuko.

<sup>127</sup> Pano vulukai kimye Elaija, palutwe, wamwichile... Panyuma ya kyokya kitapisho-kyabunga, Kilishitu, kabiji ne kulamawizha nzubo ya kituzhi Nakyo. Monai palutwe byo ayichile mujilo kufuma mwiulu, ne bikwabotu, kabiji ne kushininkishiwa kwa kutumwa, na Lesa, Mupashi wa bungauzhi.

<sup>128</sup> Monai mungyetu, kimye kyo alaajile mushi yakinchi kya yanipa, Malaika waishile na musango umotu bunga, kabiji walenga shinkwa ne kumujiisha. Kabiji palutwe kacheche wamulajikile tulo ne jikwabo, ne kumubusha, kabiji wamulengejile tubashinkwa twavula twabunga. Kabiji wayikajile na bulume bwatootwa tubashinkwa pa moba foote. Lukumo lwikale kwi Lesa! Aye uji pamotu keesha, leelo, ne myaka yonse. Oo, byo twamutemwa Aye, Kanjo ka bumupashi mukimye Kyako!

129 “Kechi kyafwainwa kutola shinkwa wa baana ne kupana ku bakabwa ne.” Bushe Yesu kechi waambile kintu kimo nenyi ku mwanamukazhi mwina Sailofenisha? Aye watuminwe kuba Kwanji Mwine. Abyo ibyo. Kabiji Aye byobyo ayishijile. . . Aye kechi waile ku Bagentila ne.

130 Kabiji pano leelo Aye wapepula ba Gentila mu kimye kyabo, kabiji kechi kyafwainwa. . .

131 Mwamba mba, “Kika Mbila kyo ibujila kuya mu ao mampuzha abaya, mu mbung’eno ikatampe, nobe mukachi ka madinominesheni?”

132 Kechi Kanjo kabo ne. Kechi kipwilo ne, byo kitelwa, Kanjo. Ke Kanjo ka Musongwa. Ke Kanjo ka bumupashi. Kakonsha kwibalengela munda kukola. Byakila kwikala nabunoshi kechi bibafwainwa ne. Mwamona? Mwamona? Anweba—anweba—kuuba mwikyuba ne. Pakuuba, ku baana, Ke Shinkwa, Ke Bumi, Ke Yesu Kilishitu pamotu keesha, leelo, ne myaka yonse.

133 Tusa kukelwa kufumamo inge kechi twakonsha kutapa mu laini wa kulombelela, nanchi twayai tukunyiike mitwe yetu pa kakimye kacheche.

134 Lesa Mutemwe, Kanjo mu kimye kyako, Kanjo ka bumupashi. Kintu kimo akyo ba panopantanda kyo babula kuyuka ne. Byo twaumvwine Nkambo wamba abwa bufuku, nangwa aja juba ku Samaliya, kifulutu kimo akyo Elisha kyo ayishileko ne kwaamba mba, “Kika, kime kechi kikanoka ne poso Najiwi jami.” Apo Yesu waimene na kubuula Banabanji babwanga.

Baambile mba, “Nkambo, kika Anweba kyo mwabujila kuja?”

Aye waambile mba, “Njina Kanjo ako komwabula kuyuka anweba.”

135 Kine, Nkambo, Kanjo Kanji kyajinga ke kuuba kyaswa muchima wa Lesa, kumona mingilo yakwa Lesa mba yasololwa mukimye Kyanji. Aye wajingako kumona mba mwingilo wayingijikwa. “Amiwa kechi nguba kintu nangwa kimo ne kana patanshi Ba Taata ba Mweesha. Kyo Bamweesha ba Taata, kyo kyo Nguba.”

136 Kabiji, Taata, nanchi byobyo kiji ne leelo. Akyo Kipwilo, waitabila kyakine, ye Mubiji wa baitabila, bobaji nasambu ku Kanjo, Kanjo ka bumupashi, ako bashala kechi bekayuka ne. Ayo ntanda kechi yayukapotu nangwa kimo pa kako Kanjo, Taata. Pakuuba Kipwilo Kyenu, bantu Benu, aye Musongwa Wa Mwaanenu, Wikitemwa.

137 Tuji na sambu ya luboko lwa mibiji yetu umvwe ma dokotala bakakalwa. Tuji na sambu ku kikye. Ke kamo kaatwa Tunjo twaakwa Lesa, kabiji Aye wapaine ku Kipwilo Kyanji, kabiji wikilayile mumoba akumpelo ku baana Banji baitabila.

Taata, tukwashai kwikala baana balwitabilo, mambo bintu byonse byakonsheka ku baitabila. Kiswishai, Lesa Mutemwe. Twikipuzha mu Jizhina ja Yesu. Amena.

<sup>138</sup> Naketekela Billy wajikumbula mba baji kupana bitupa bya milombelo. Inge muntu wakonsha kumbula kisopelo kiji pa kitupa, akyo kyokyoka kyo Mbena kukeba. [Muntu umo waamba mba, “C.”—Waku.] C, kijitu bulongo, twayai tutole C, kamo, pa kutatwila, poso Ngikele na mulaini wetu watatula. Monai, bino, bakonsha kwikala konsetu. Pano, inge yense. . . Kyawama, monai, Mbena kweseka bibye. Ami kechi nayuka ne kana twakonsha kwi kyuba nangwa ine. Nangwa tusakwikalatu na mulaini wa kwita; ngiikalaitu zoo. Kechi kiji nalukatazho kwi ami ne. Inge mwakonsha kwiya kuno ku pulatifomu, nangwa kwikala na mulaini wakwita, kechi kiji nalukatazho ne, monse monsetu. Amiwa naimenatu pabukwasho bwa Mupashi Wazhila. Amiwa naimena pa bukwasho bwanji Aye kupana bukikizhi ku kikye Kyambo kyo Nasapwila.

<sup>139</sup> Mulongo George Wright, Nekiketekela Kye. Kufuma kubusongwalume bwami, naishilenga kunzubo myaka yavula kunyuma, na telekelenga ku ng’onyi waikele ku kinchi, Nakiketekelatu aya Mbila imotu. Naketekela namba Ikijitu imo.

<sup>140</sup> Kijitu bulongo, Namona babena kufunga kunyuma akwa pakuuba mba balenge mulaini. Kijitu bulongo, kitupa C kya milombelo, kubala wanu, tuu, fiili, foolo, faivi, iyai patanshi ne kwimana papo. Inge kechi mwakonsha kwimana ne, mwakonsha kusutulakotu maboko enu, bamo mwiabo basakwiya na kwimutatamika. [Muntu umo waamba kwi Mulongo Branham—Waku.] (Kyo kika? Ee. Uu-uuu.) Kitupa C kyamilombelo, wanu, tuu, fiili, foolo, faivi. Kabiji pano monai, anweba mwabula kitupa kyamilombelo. . .

<sup>141</sup> Bino, kechi Nakikalapo na mulaini wamuyuwe musango pa kyalepa, kimye kyalepa. Baanga babena kuvuluka mwingilo wami kimye kyo twanshimikilenga tambanako pano? Waambile mba, “Ingila mwingilo wabusapwishi.” Kechi kyaambiwe mba Ne musapwishi ne. Waambile mba, “Ingila mwingilo wabusapwishi,” monai, “mambo kimye kikeya apo po kikapipulwa.” Akyo kimye kibena kufwenya peepi. Kijitu bulongo. Pano, mu kikye, Aye. . .

<sup>142</sup> Kuuba mwamvwangakanya nyingijilo tuu nangwa fiili pamo ne, kafunga ne musapwishi, pa kimye kimo. Kuuba waikala ke—ke ngauzhi kabiji kape ne kafunga, pa kimye kimo, monai, mambo muji namingilo yapusana, nyingijilo yapusana.

<sup>143</sup> Pakuuba aye Nkambo wapele kyo Nakonsha kuuba mu Mbila yami. Bino nanchi Aye waambile mba, “Ingila mwingilo wabusapwishi, shininkisha mwingilo obe, mambo kimye kibena kwiya po bakabula kuswa Mafunjisho alumbuluka.” Inge akye kechi kyafikizhiwa pa kino kimye ne! Kipwilo kyonse kya



dinominesheni bankana amiwa. Abo kechi bakonsha kuswa Mafunjisho alumbuluka. “Bino byo baji na matwi ababana bakevujishisha bafinjishi babo, kabiji bafutulwila matwi abo kubishimitu. Kabiji bakooba bintu bikatampe bingi nobe Yanesa ne Yambalesa monka mobamukosakenjile Mosesa, bino byubilo byabo bikasoloka.” Mwamona? Mwamona? Kijitu bulongo, bakipashang’anya! Mwamona Yanesa byo . . .

<sup>144</sup> Kabiji, Lesa wa Mwiulu wayuka, akyo kyaikala poopa pa jibwe ja- . . . (wayewa tambanako) . . . -kitendekesho kufuma mu 1933, kyanembelwe pa kibaba Baibolo, uji ponkapa. Talai byo bekyuba. Talai byafikizhiwa. Bakipashang’anya, byonkatu byokiji. Waambile mba, “Balekai bunke bwabo, byubilo byabo bikasoloka mu musango umotu byonka byokyajinga Yambalesa ne Yanesa.” Tuji pango mujoja juba.

<sup>145</sup> Namwene kipwilo pa kyokya kimye byo twabikilenga jibwe ja kitendekesho, bantu baimana pa mawindo ne kuzhookoloka, saka baimana ku bibumba bya tambanako. Byobyo kiji. Abo baambile mba, byo kyayishile, bantu bamuyeuno muzhi, baambile mba, “Mukachi ka bangondo sikisi . . .” Atweba nsatujitu na dola umo ne mangwe eiti kunshimika tambanako, bantu bavula baji namwakulamina myotoka baambile mba kikekalatu ke kyabo mwakulamina myotoka. Bino kikijitu ke kipaka kya mikoko mwakwikala Mikoko ya Lesa.

<sup>146</sup> Wanu, tuu, fiili, faivi, sikisi, sebeni, eiti, naini, teeni. C, sikisi, sebeni, eiti, naini, teeni. Kijitu bulongo.

<sup>147</sup> Pano, “Amiwa Yehoba na byala, Kekitekezha mute ne bufuku kuchina muntu umo wakekisopola mu maboko Ami.” Talai pa kujimbulula! Kafwako dinominesheni wa kwi Kitabizha. Kechi kwajingapo bipwilo biji nobe Akyo ne kuzhookoloka kyaalo kino ne. Kafwako Pentekositi mu kyaalo, kafwako nangwa umo wa Kwikitundaika ne. Muntu yense wapuseneko mu lubatizhilo lwa mu meema, muntu yense wajinga wapusenamo na bintu bikwabo. Ne kusemi kyamitu, ba taata bami bakanyijile kumo kufuma kukizhilo, Natolele byakuvwala byami ne kubika muka jisaka naile na kwikala ku New Albany. Kijitu.

Pakuuba kupita ma bya bulwany, lumanamo  
ne bya tukose,  
Naiya kala;  
Ke lusa lwandeta kufikizha pano,

Amiwa njina myaka fiifite-sikisi, kabiji bukumo nafwainwa kwabuka bushiya bwa mukola.

Lusa lukatwajijila na kundama.

Byo Nkekala kookwa myaka teeni sauzande,  
Kutoka kwa kusama nobe juba;

Kechi tukekalapo na moba acheche akwimba  
ya kutota Lesa ne  
Kufumatu byo twantendekele.

Oo, byo Namutemwa Yesu! Aye yo ntanda yonse kwi amiwa!

<sup>148</sup> Oo, kijitu bulongo, baanga bo Na...? Peepi po Nakonsha kulekela, teni? Twakonsha kutolapo ne bakwabo nyi? Kijitu bulongo. Yajinga ka, teeni, fiifitiini? Kijitu bulongo. C, teeni kufika pa fiifitiini, konse koomuji, mwafwainwa kwimanako ne kutwela mukachi. Kwaambaka? Uuu? Kijitu bulongo. C, fiifitiini kufika ku tweeti, nanchi. Ao ekale C, fiifitiini kufika ku tweeti. Ako ke kuuba mba bantu bakwabo teeni. Twamona... Mwamona—mwamona paji laini popa, kechi tusa—tusa kwibavuzhako ne. Kabiji tusa ku... Kijitu bulongo.

<sup>149</sup> Pano ntelekai kuno; kechi tusa kubanda ne. Bino, pano, oo, ng'anyi awala, ng'anyi kimye! Nasaka—Nasaka namba inge muntu yense watemwa Nkambo. Nasaka—Nasaka namba twafwainwa kufika bonse pa kifulo kyo twafwainwa kuyuka buwame bwa uno mineti. Twayai twikyeseke. Taayi muchima wenu kwi amiwa.

<sup>150</sup> Kika—kika kyo tubena kuba pano? Tubena kubika Kyambo kya kwa Lesa mu kwesekwa. Elaija naye waubiletu kintu kimo, wafuminetu ku mutumba byo ayukile mba Lesa ye wamutuma kwi kyuba. Aye waambile mba, “Pano twayai tushininkishe kana Lesa yeng'anyi, lekai Lesa ukumbula na mujilo ekale ke Lesa.”

<sup>151</sup> Kabiji bantushi bechiiba, oo, ne kwamba mba, “Kyawama, kyakine ine...” Abo—abo bantushi bayukile mba mujilo kechi usakwikila ne, nanchi babijikilenga ne byakuba uba.

<sup>152</sup> Pakuuba Elaija wayukile mba usakupona, mambo wajinga na kimwesho kufuma kwi Nkambo.

Anweba mwaamba mba, “Aye wajinga na kimwesho nyi?”

<sup>153</sup> Ee, mwane! Byo apwishishe kutachika byonse mundonda, aye waambile mba, “Nkambo, Nauba byonse bye monka mwaila mukambizho Wenu.” Kabiji ne mujilo watatwile kupona. Umvwe Kyambo kya Lesa kyaalamwa kufika ne kumpelo, nanchi byashala ke mwingilo wakwa Lesa wa kufikizha byonse. Aye wimwipuzhatu amba mwikitule ponkapa. Kabiji waikala washinikisha mba waitwa kwikitula popa. Mwamona? Kabiji inge byo uji, Aye ukalamawizha byonse byashala.

<sup>154</sup> Pano, kuno kusakwikala bantu basakwiyanga na kupita muyuwe mulaini ye Nsakulombanga... Pano, kyawama, pano mujitu kwipi na kibumba, kiji bulongo, mulaini pakuuba mba atatule. Pano, patanshi, kape kutu kumo monka muno mukinshikwa, bantu bamo...

Baanga muno bakolwa bino kechi banji na kitupa kya milombelo ne, sutulai kuboko kwenu. Monai, konsetu. Bino, mwayuka inge Nkambo yetu... Kabiji Naketekela namba Aye

wakonsha, inge Aye ye umotu keesha, leelo, ne myaka yonse. Aye wajinga na milaini ya milombelo. Bantu baiyanga kwi Aye mu milaini ikatampe, mabuumba, Aye wibakwachile, wibapesheshe. Nanchi Aye kimye kimo waimene ne kwaamba mba, “Ng’anyi waji Kukwata?” Watajile kuzhokoloka, wamubuujile mwanamukazhi ene mambo kyo Amukwachijile; kabiji waambile mba mwalo obe wamashi wapwa, lwitabilo lwanji lwa mulengela kwikala mututulu.

<sup>155</sup> Pano umvwe waalulukile ne kwaamba mba, “Kyawama, Amiwa kechi nayuka ne, Nkambo, Naikala na kikye pakimye kyabaya”? Inge kechi kyamwekele ne. Ine, inge kechi kya mwekele ne. Ine.

<sup>156</sup> Pano inge Aye wabuujile mwanamukazhi mwina Silofenisha, “Mambo abibye byambo byo waambile, mwaanobe wamukazhi, diabola wafumamo mwiaye,” pano inge waambile mba, “Kyawama, pano, Nkambo, Na—Nakebele Anweba kwikyuba *muyuwe* musango”? Awa—awa diabola wafwayijilwe kutwajijila kwikala muyewa songwakazhi. Bino aye waketekejile kumutana mwaanaji mu musango ye Aambijilemo amba ukamutainamo.

<sup>157</sup> Pano, Aye witubuujile, “Umvwe mwakonshatu kwitabila! Inge wakonsha kwambila awe mutumba, ‘Obe fumapapo,’ kabiji ne kuzhinauka mu muchima obe ne, pakuuba waitabila mba kyo waamba kikeya kufikizhiwa, wakonsha kwikitambula. Umvwe mwalomba, ketekelai mba mwikitambula, kikempewa.” Awe mulaye!

<sup>158</sup> Pano bino muntu usapwila mambo awama abumuntu aye kechi waketekela mubyobyoby nangwa pachechetu ne. Aye wakonsha kwiiya kukibelo, watalamo, nangwa waimana popa, ne kwaamba mba, “Kyawama, ke jibuumbatu jabakwabo boba kyongyo kyazhila,” kabiji wabwela wafumako. Mwamona? Bino aye kechi wayuka amba anko ke Kanjo kafyamika ne. Aye kechi wayuka ne amba a kye ke Kintu kyafyamika kwi aye ne. Aye kechi wikiyuka ne. Ke—ke—ke kyalusa, ke milanguluko iji bwamba, yabuyaji, bumpofu, ne kwikiyukatu ne. Mwamona? Akye ke kintu k yatama.

<sup>159</sup> Anweba Lesa, ndekeyi amiwa nafwa patanshi, bino amiwa kechi mwafwainwa kutana muyewa musango ne. Kyawama ami kufwa (ee, mwane) kukila kuuba kyokyo. Naketekela mba yense mwiatweba twafwainwa, bushe kuuba twikyuba nenyi?

<sup>160</sup> Pano, bino, Lesa witulaya abye bintu mu moba akumpelo. Mu Malakai 4, yaamba mba Yesu Kilishitu ukeya pashi ne kwipashang’anya Ayemwine mu bumuntu byonka byo Aubile mu Sodoma. Abyo ibyo. Kabiji waambile mba ntanda yikekala mu kipasha kya Sandoma. Kabiji waambile mba, “Byonka byo kyajinga mukyokya kimye, aye Mwaana muntu ukasololwa mujoja juba.” Monai, awe Muntu waishile pashi mu musango wa

bumuntu, ao wajinga “Elohim,” kwi Abulahama, awe mwaana walailwe saka akyangye kwiya. Talai byo ajinga, Abulahama waambile mba wajinga Lesa. Kabiji Baibolo waamba mba kwaishile banabalume basatu kwi aye, lukungu pa bya kuvwala byabo, baenda, baikala ne kuja nobe nobe bantu. Kabiji Yesu waambile mba, “Ponka pa kimye ntanda po ikekala mu byubilo bya musango wa Sondoma, apo Mwaana muntu po akesolola Ayemwine jibiji.” Kechi Mwaana Lesa ne, Mwaana muntu, monai, ukesolola Ayemwine.

<sup>161</sup> Pano labijilai kyokyo na kyaambile ngauzhi wapelako, “Talai, Nkemutumina Elaija ngauzhi, kabiji aye ukeyalulwila aya—aya michima ya baana ku bashabo.” Mwamona? Ke Mbila ya kwibabwezha ku Baibolo, kabiji ne Mwaana muntu ukesolola Ayemwine mujoja juba. Kabiji mu joja juba ja kusaka kwimba mu nkulo ya kipwilo kya pelako, aye malaika wa butanu na bubiji, bya fyamika bya Lesa byafwainwa kuyukanyikwa. Atwa Tutetesho Tutanu na tubiji tu kashinkulwa. Byafyamika bya mu byonse bye bipwilo ne bintutu bikwabo, mo bya mwekejile, kabiji ne byau- . . . mwepei, bika bya mwekele.

<sup>162</sup> Monai, abo kechi Bekiyuka ne. Yesu waambile mba, “Anweba bampofu Bafaliseo!” Waambile mba, “Inge bampofu batangijila bampofu bakwabo, kechi bonse babiji bakonsha baponena mukimbo nenyi?” Monai, oene mambo abo bantu kyo babujila kwi kimona Kyokyo.

<sup>163</sup> Kyafyamika kya Mukyokyo, ke, atwa Tutetesho, kyonse kya mubyobya bipwilo balengelemo kabungwe kabiji ne kutwelamo, kabiji akyo kyokintu kimo kyafyamika k yatama kumeso akwa Lesa. Mwikimona nyi, Dokotala Lee? Monai, talai. Byo kinji. Apo popaji kintu. Akyo kyo kimo kya byafyamika. Abo balengelemo kabungwe, monai, kabiji akya kyajinga kyabula kya mukyaswa muchima wa Lesa. Kabiji abya bikaletwa patoka mu moba akumpelo, ne kutangijila bantu, kechi ku mafunjisho abantu nangwa ku dinominesheni ne, pakuuba kubwela ku Kyambo kya bukine. Kabiji Kyambo kya bukine kikeya kumusango umo wa bantu, kabiji Mwaana muntu ukesolola Ayemwine mu kachi kaabo, “aye ujitu pamo keesha, leelo, ne myaka yonse.”

<sup>164</sup> Oo, ami! Oo, Natemwa kyokyo. Natemwa kwamba pe Aye. Natemwa ku—ku Kumubaisha ku meso a bantu. Amiwa kechi nakonsha kumubaisha Aye ne; Wabaya kala. Aye waya bingi mwiulu kuuba mwamukiluka peulu Aye ne, waya bingi mukuzhika kuuba mwamukiluka pashi Aye ne, wabaya bingi kuuba mwamuzhookoloka Aye ne, bino nangwa byokabyo muji nampuzha Anji mu muchima wenu. Kuuba Aye mwamutambula nenyi? Byo awama aye Nkambo yetu! Kijitu bulongo.

<sup>165</sup> Pano twayai tuzhindame bingi, atweba bonse. Pano, twaambapo pa Kikye. Kabiji pano kine kintu ke, bushe Kya bukine nenyi? Bino, kape mujipo benyi muno. Nakonsha

kwaamba mba inge . . . kwi anweba, inge Kilishitu ujitu pamo keesha, leelo, ne myaka yonse, Aye wakonsha kuuba byepi mu uno mineti? Aye wakonsha kuuba kintu kimo kyo Aubilepo mukimye kyo Ajingapo kunyuma. Abyo ibyo nyi? Alo lwitabilo lwa bantu lwa konsha kukwata ku kya kuvwala Kwanji, kabiji Wakonsha kwaluluka. Nobe Aye byo aubile na mwanamukazhi ku mushima, kabiji Aye waubile mu mampuzha akwabo, kabiji Wayukile milanguluko yabo.

Pano, mwaamba mba, “Bushe Aye wakonsha kumbuka ami nyi?”

<sup>166</sup> Kyambo Kyanji kyaamba mba Aye wiikyuba kala. Bino kine kintu ke kya kuuba mba, mba Ayemwine ayukanyikwe mba Aye uji muno.

<sup>167</sup> Pano, inge Aye wamwekele kwi atweba mu mubiji, wamwekeletu pamo nobe walengele Hofmann *Mutwe wa Kilishitu pa Saate-fiili*, kabiji mashi abena kupopoloka kufuma mu maboko Anji, ne bikwabotu, mikovu ya misumali pa mubiji Wanji, Amiwa kechi nakonsha kwi kiswa ne. Ine, ine. Ine, ine. Byo akeya Aye, Ayemwine, “Jiso jonse jikamumona Aye, majimi onse akanwitabe Aye; mambo byonka byuba kubesha kwamvula kufuma ku Musela ne kumwekela ku Muzhika, byo kikekala.” Mwamona? Atweba kechi twaketekela mu bisemi ne mubisho ne. Twaketekela mba Lesa kyo Kyambo.

<sup>168</sup> Pakuuba Aye wibiika mu mubiji Ayemwine, kutola mubiji wenu ne wami, ne kwimupa bya bupe, ne kupa amiwa bya bupe, kabiji kupichila mu bibye bya bupe Aye Mwine wisolola. Ako ko Kanjo kabufyafya. Nangwatu Aye wakonsha kwimweshwa byepi Ayemwine kupichila mwi amiwa, mwafwainwa kwi Kiketekela, wafwainwa kwikala na bupe bwa lwitabilo, ne anweba, lwa kwi Kitabila. Mwaketekela kyo kyo nyi? [Kipwilo kyaamba mba, “Amena.”—Waku.] Kabiji pano Aye inge wakonsha kwi mwesha Ayemwine muyewa musango, mwakonsha ku muketekela Aye nyi? [“Amena.”] Namuchima wenu yense, mwakonsha kumwitabila Aye nyi? Oo, byo kyawama, ku pembelelatu pe Aye, kupembelelatu kumona kyo Aasakwamba.

<sup>169</sup> Pano pajipo muntu umo waimana papo. Amiwa kechi namumonapo mu bumi bwami ne, nobe byo Nayuka. Ubena kumweka nobe wawama, wakonsa, muntu wa bututulu bwa mubiji bwawama, kabiji kape uji, Ami—Ami—Ami kechi nayuka ne. Bino aye waimana popa. Pano, Nakonsha kuya na kuteteka maboko pa yewa muntu ne kumulombelela, mwimpuzhai inge wakonsha kwi kitabila. Aye wakonsha kwimana papo ne kumbuula, kwaamba mba, “Na—Na—Nasaka namba mulombelele *Kananga-ne-kananga*. Kabiji Njina—Njina na bintu byavula. Njina mutwe watata, kwakubula kuleka ne. Njina bilonda bya munda,” nangwatu kintu kikwabo. Aye—aye,

Amiwa kechi nayuka ne. Aye wakonsha kwaamba kiji kyonse pa byobyoyo.

<sup>170</sup> Nakonsha kwaamba mba, “Kijitu bulongo, mwane, mulongo. Nsakubika maboko ami pe obewa ne kukulombelela.” Akyo kya konshatu kwikala bulongo. Abyo kine ibyo byo twaubapo kupita mu nkulo yonse. Abyo ibyo nyi?

<sup>171</sup> Bino, vulukai, Yesu waambile mba kikekala kya pusanako peepitu nakwiya Kwiya Kwanji, nobe byoka byo kyajinga mu moba amu Sondoma. Kabiji awa Muntu waishile, wajinga nanyuma Yaji yavundamina kwajinga Sala, kabiji Aye waambile mba, (kechi “Abulamu,” pano) “Abulahama.”

<sup>172</sup> Monai, aye wajinga Abulamu, juba japita. Bino wakumenye kimwesho, kabiji ne Yehoba wamwambijile mba, “Amiwa nsakukukigya jizhina jobe.”

<sup>173</sup> Kabiji apano Yehoba, Ayemwine, mu musango wa muntu, kuja ne kutoma naji. Waambile mba, “Abulahama, mukazhobe ujipi, Sala?” S-a-l-a; kechi S-e-l-a-i ne.

Aye waambile mba, “Uji mutete, kunyuma Yenu.”

<sup>174</sup> Waaambile mba, “Amiwa nkakupepula, monka mwayijile mulaye Wami myaka tweeti-faivi yapitapo.”

<sup>175</sup> Kabiji Sala waubile nobe waseka mu kachi nkaji. Aye waambile mba, “Sala wasekele mutete pokapotu, ne kwaamba mba, ‘Abye bintu bya konsha kwikala byepi?’” Uu-uu. “Kujipo kyakonsa kwi Lesa ne?” Mwamona? Kafwako ne. Ine, mwane.

<sup>176</sup> Pano Aye waambile mba, Yesu walaile kyokyo, “Aye, Mwaana muntu,” ayo ye Kyambo, (bushe mwaitaba kyokyo?) “ukeya mu moba apelako ne kwi solola Ayemwine mu kimye ntanda po ikekala mu mubyubilo bya Sodoma ne Gomola.” Mwaketekela mba akyo kijitu bulongo?

<sup>177</sup> Potukyanyge kwikala namulombelo umu, anweba bamo koko lombai ne kumona kana aye Mwaana muntu ukijitu pamo keesha, leelo, ne myaka yonse. Anweba impuzhatu umvwe Aye iye, ne kwaamba mba, “Nkambo, awe muntu kechi wanyuka ne, bino Nayuka mba Anweba yenu umotu keesha, leelo, ne myaka yonse,” monai umvwe Aye usakwimubuula kyokyo.

Ee, mwane. Pano ngiisutulaiko mitwe yenu pa kakimye kacheche.

<sup>178</sup> Uji panyuma yami. Ke kamwaana. Mubiji wako ubena kupyana na mashika. Ke kasongwakazhi kacheche. Mwafuma kusa ya uno muzhi. Awe mwa uji na lukatazho lwa munda. Kyamubilwa. Ketekelaitu.

<sup>179</sup> Pano, bushe abye ibyo byo Aambile Aye amba ukeyyuba? Amiwa kechi nakimumonapo awe muntu mu bumi bwami. Lesa wa Mwiulu wayuka kyokyo.

<sup>180</sup> Aye mwanamulume papo, ubena kumweka bingi ku kosa ne bututulu. Bino monai kyokya kivule pa mutwe wanji kookwa? Akyo kyalumbulula mba, kanatu Lesa wamukwasha, kechi wakonsha kwikala kimye kyabaya ne. Uji na kansa. Kanji mu mapwapwa.

Pano, aye Mwaana muntu uji pano.

Aye uji na kisendwa pa muchima wanji na mambo akasongwalume kakacheche, ka mwaana ka kacheche. Abyo ibyo nyi? Mwaketekela mba Lesa wakonsha kumbula kyatama ku mwaana nyi? [Aye mulongo waamba mba, “Nayuka Aye wakonsha.”—Waku.] Aye wakonsha. Aye uji na bimye byakupona nobe kinshimu. Wajikukwatwa ku kimo katataka. [“Luno lukeelo.”] Abyo ibyo, lukeelo luno. Kabiji mwaketekela mba musakwikala na kukomesha yewa nsongwalume, kabiji aye usakwikalatu bulongo?

<sup>181</sup> Nga Charlie Cox ujipi? Uji kwepi? Charlie, ujipi? Nakulanguluka mba uji kuno bufuku buno. Awe kuke, Charlie. Gary, uji kwepi? Larry, bushe uji muno nyi? Waji songwalume wamucheche wajinga nakintu kimo, byonsetu pamo. Uji kwepi, Larry? Iya kuno pa kaminetitu. Kyawama, awe papo. Awe songwalume wamucheche wajingatu na kintu kimo. Bashanji ne bainaji ke batemwe bami bingi. Myaka yavula Najinga kooka, ne uwe songwalume wamucheche naye waponanga pabimye pabimye, kufita pameso ne kupona. Kyajinga kanshita. Nekimwene pa kasongwalume ka kacheche, naimpwizhe Lesa kuuba mba amubuke. Aye kechi wakikalapo nakikwabo ne kufumatu ponka po. Aba bo bashanji; bainji baikala kukwe kuntu kumo; kabiji awe ye songwalume wa mucheche, yemwine.

<sup>182</sup> Pano mwaketekela nyi, mwane? (Nakusachila, Larry.) Anweba mwaketekela, mwane? Aye Lesa wa Mwiulu apane kintu kimo kwianweba, kabiji ne kwikala nabumi ne kumukomesha mwaana. Lesa emupeshe.

Twayai tulombe.

<sup>183</sup> Lesa Mutemwe, mukwaashai. Nalomba mba lusa Lwenu ne bupe bikale pe aye ne kumupesha. Mu Jizhina ja Yesu.

<sup>184</sup> Yainga pano ku Louisiana, na lusekelo, mutumbijikai Lesa na mambo a aye.

<sup>185</sup> Oo, ee, wafuma ku Louisiana, kine kyo kyajinga, kwipi na Kizhiba kya Charles. Ibyo. Monai, Nakonsha kukwata milanguluko yenu. Lutumbijiko lwikale kwi Nkambo!

<sup>186</sup> Kyawama, mubena kwipuzha pa—pa kintu kyawama, ubena kukeba kwikala na mwaana. Anweba muji kala na baana, baana bavula, bino mubena kukeba mukwabo. Aye Lesa wa Mwiulu ekipane kwi anweba, nyenga yami. Iya kuno, Nasakatu kubika mamboko.

187 Lesa Mutemwe, panai ku mwanamukazhi kukabila kwa muchima wanji, mambo ke kintu kyawama. Mujizhina ja Yesu. Amena.

Pano yanga ukekale na mwaana.

188 Lesa ye Lesa wawama. Mwikiketekela akyo nyi? Aye wayuka byonse bya kukabila byetu. Aye upana kukabila kwetu konse inge twikiketekela. Aye waambile mba, “Inge wakonsha kuketekela!”

189 Naimwine kuboko kobe kuntu kumo. Amiwa kechi nakonsha kuvuluka kwine kuntu ne, bino kuntu kumo Naimwine kuboko ko. Amiwa kechi nakonsha kuvulukatu bulongo ne, bino twajinga kuntu kumo, leelo kuntu kumo, bino kechi Nayuka pene patu ne. Bino ako kechi iko, kechi twaishila kwamba pakyokyo ne. Muji kuno amba mwambepo pa, nangwa kulomba, mwakeba ami mba ndombe muntu umo. Abyo ibyo. Aye kechi uji kuno ne. Aye uji ku Georgia, wakolwa. Kechi aye wakolwatu ne, kumubiji konka ne, bino ne kumupashi nako wakolwa; muvyala obe. Mwaketekela mba Lesa usa kwingila kikye mambo mwaimana kulubaji lwanji? Byo mwauba? Iyai kuno kabiji ne kulombela pamo.

190 Lesa mutemwe, panai kuyuwe mwanamulume kukabila kwa muchima wanji, amba aye na kutana awe muntu ubena kujijila Lesa. Mu Jizhina ja Yesu Nekipuzha. Amena.

Lesa emupeshe. Kuzhinauka ne. Ketekelai na muchima wenu yese.

191 Muji byepi? Kechi namambo akuuba mba Amiwa najikubula kwimuna kuboko kwenu pakutatula ne, byo mwajikusutula kuboko kwenu, Najikumonangapo kintu kimo. Kyajinga kivule, kyafituluka bingi ne kufita. Ao oene mambo. Nayuka Najikumona kuboko kobe, Naji kwikimona muyewa musango, mwamona. Bino ke kaasa. Mwaketekela mba Lesa wakonsha kwi kifumyapo nyi? Kiji pa jibele jobe, ku lubaji lwa kipiko. Mubena kukeba kubwela ku Carolina na kutakaika Nkambo pa mambo akutambula bututulu, ke ibyo nyi? Mwamona mo Nekitazha? Twayai tulombe.

192 Lesa Mutemwe, mu Jizhina ja Yesu Kilishitu, Ao Umo ujipo; baana kunja Shinkwa wa Lesa, awe mwaana naye omvwe buwame bwa lwitabilo, Shinkwa wa Lesa ao Aye ye amupa wa lubuko lwaji. Aye ayenga na kwikala bulongo, mu Jizhina ja Yesu. Amena.

Lesa akupeshe, mulongo. Ketekelaitu na muchima wenu yense.

Muji byepi?

193 Bushe kikye kechi ke kimye kyawama nenyi? Kyamwekatu nobe buyuke bumo bwaikala pa bantu. Nangwa, kyakosha kumvwanika nobe, matwi ami, nobe kintu kimo kibena kuya,



“Whew!” Kyapangatu kyongo, nobe, “Whew,” nobe byobyoy, monai. Ke Shinkwa wa baana. Mwamona? Ke byenu. Ke kyobe. Kechi kyami ne; Ke kyenu. Nasata bingi, ponka pakino kimye, Amiwa kechi. . . Amiwa jitu bulongo, papela kuyuka Kwami; bino Ke Shinkwa wami, ne amiwa, inge Naikala na kukabila. Ke Shinkwa wenu. Ke lutundaiko. Kwi anweba mwabula ne kukolwa, kiletatu kusutula michima yentu ku meso akwa Lesa.

<sup>194</sup> Akye ke mukine kimye, byo Aambile Aye mba ukeyyuba, “Kabiji byonka byo kyajinga mu mobo a Sodoma, nanchi byobyoy kikekala pa kwiya kwa Mwaana muntu, mu kimye Mwaana muntu po akesolola.” Mwamona? “Kabiji, talai, Nkemutumina Elaija ngauzhi juba jikatampe ja Yehoba jilengsha moyo kasa jikyanye kufika. Aye ukeyalulwila michima ya bantu kwi Bashabo.” Mwamona? Mwamona?

<sup>195</sup> “Kabiji ne baoloka bakanyataula pa—pa babi, pa buto.” Bakasokwa nobe mujilo wa mukintetengwa, monai, ntanda byobyoy ikobiwa. Twamona mba kikakulukilamo. Kabiji mujilo wa mumunshiji ukakumbana pa ntanda pose, kabiji ne meulu nao akatema mujilo.

Anweba Jibwe ja Myaka, ngubilai lusa pano, kabiji nanchi.

<sup>196</sup> Muji byepi? Kyawama, kintu kimo, muji nalukatazho lwa bainetu, lukatazho lwa banabakazhi. Uji na bintu bikwabo. Uji na lubazhibazhi, wafikatu pa kyokya kimino kya kwikala na lubazhibazhi. Byalubankana bya misango yonse. Pakuuba uji na kukabila, ne aako, ke kwa kukabila kutambula Mupashi Wazhila. Abyo ibyo. Abyo byobyoy kiji. Bushe mwaketekela anweba. . . Mwisolola byonse nyi? Mwaketekela mba umvwe Nabika maboko pe obewa ne kwipuzha Lesa amba ekyube, Mupashi Wazhila usa kwiya nyi? [Aye nyenga waamba mba, “Ee.”—Waku.] Mwaketekela kyokyo nyi? [“Ee, mwane.”] Twayai tulombe.

<sup>197</sup> Lesa Mutemwe, Nabika maboko ami pa yuwe mwanamukazhi, mu musango wa butumwa, kabiji nalomba mba atambule lubatizhilo lwa Mupashi Wazhila. Mu Jizhina ja Yesu Kilishitu, aye e Kitambule. Amena.

<sup>198</sup> Kechi mwikizhinauke ne. Kya kulubaji lobe, monai. Ke kyobe. Ke—ke Kanjo ka baana.

<sup>199</sup> Najingapo nang’umvwino imo yatamako byo Najikwaamba mba, “lukatazho lwa banabakazhi,” kechi ibyo nyi? Mambo akyo kyowajinga nakyo, ne obewa. Pano waketekela mba usa kwikalatu bulongo ponka panonyi? Yanga, na kusachilatu Nkambo.

<sup>200</sup> Muji byepi? Bushe mwaketekela na muchima wenu yense nyi? Mwaketekela mba musakuya nakuja byonka byo mwajanga myaka yavula yapita nyi? Kijitu bulongo. Yanga, na kwaamba mba, “Nemusachila Anweba, Nkambo. Nekiketekela.” Akyo Kyeenyi kya Nkambo.

201 Mwaketekela mba alwa lukatazho lwa musana lusakwimuleka kabiji mba musakwikalatu bulongo? Kijitu bulongo. Yaingatu, na kwaamba mba, “Nemusachila Anweba, Lesa mutemwe,” kabiji Lesa usa kwikiswisha.

202 Mwaketekela mba mwakonsha kwikalatu bulongo, Nkambo usa kwi mubuka, kabiji kechi mukekalapo na kikola kya mashimba ne, ikalai bulongo kabiji ne bututulu? Mwaketekela kyokyo nyi? Yanga, nakumusachila Aye, ne kwaamba mba, “Nkambo, Natambula namuchima wami yense, kabiji Nekiketekela.”

Mwikiketekela byepi anweba bonse Pakikye?

203 Anweba muji papo, bikai kuboko kwenu pa yuwe mwanamukazhi waikala kwipi nakomuji, mubuulai mba mishipeshipe ne kikola kya mashimba kisa kumuleka. Umvwe wa...?...

204 Lesa emupeshe. Mwaketekela mba musakwikalatu bulongo pano? Yainga kunzubo na kwikala. Lesa emupeshe. Yainga kunzubo kwenu, ne kwaamba mba, “Nemusachila Anweba, Nkambo Yesu.”

205 Muji byepi? Mwaketekela mba lukatazho lwa banabakazhi lusa kwimuleka, ne alo, Kabiji mba musakwikalatu bulongo? Yainga, ne kwaamba mba, “Nemusachila Anweba, Nkambo.”

206 Muji byepi? [Aye nyenga waamba mba, “Nendonsele mushipeshipe.”—Waku.] Kika, ami, ami! [“Totten.”] Nayuka jizhina jobe. Na—Na pijijilwe ku... [“Totten.”] kimye kyo Nafung’anga kipwilo kya Baptist. [“Totten.”] Totten. [“Della Totten.”] Nyenga Della Totten. Ukena kumanyikwa na lukatazho lwa musana. [“Ee.”] Usakwikalatu bulongo, pano. Mwaketekela mba Aye usakwimulengela kwikala bututulu? Mwavuluka kyamwekele myaka yavula kunyuma akwa mu kipwilo kya Baptist ku Milltown? [“Ee, Navuluka kyokyo!”] Aye ukijitu Lesa umo leelo. Lesa emupeshe, nyenga yami.

George Wright, ujipi? Mwavulukanyi? Ami, byepi. . .

Mwaketekela, inge Nabika maboko ami pe obewa, na kukwe kushingwa, mwaketekela mba usa kwikala bulongo nyi? Iya kuno. Mu Jizhina ja Yesu Kilishitu aye abukwe. Amena. Ikalai na lwitabilo!

Kyawama, bushe bonse mwaketekela na michima yenu yonse?

207 Pano, abyo bileta bulongo bya kuvuluka bya kala, pakumona awa inetu! Nakonsha kuvuluka jizhina jaji, nangwa byokabyo, bino Na... [Muntu umo waamba mba, “Totten.”—Waku.] Totten. Totten, abyo ibyo. Oo, ee, mwanaji wamukazhi wajinga Bertie. Abyo ibyo. Abyo kine ibyo. Kechi mulanguluke amba Naya mungi ne, Amiwa jitu nobe pacheche, mwayukatu, kiji nobe... Amiwa kechi nakonsha kwi kilondolola ne.

208 Bino lukatazho lobe lwamusana lwapwa, inetu. Yanga, tumbijika Nkambo, ne kwaamba mba, “Nemusachila Anweba, Nkambo.”

209 Mwaketekela mba lukatazho lweni lwa muchima lusakwikalatu bulongo, ne alo? Yangatu, nakusangalala, ne kwaamba mba, “Nemusachila Anweba, Nkambo Yesu,” kabiji Kiketetekele. Kijitu bulongo. Ikalai na lwitabilo pano. Kuzhinauka ne.

210 Iyai, inetu. Bushe mwaketekela na muchima wenu yense nyi? Uji nabintu byavula bya lubankanako. Uji nalutakazho lwa musana, ne alo. Mwaketekela mba Lesa usa kwi mubukanyi? Kijitu bulongo, yainga, nakusangalala. Ao, ao Yeaye wimulengela kwikala na yoyo ng’umvwino. Musachilai Nkambo. Lesa emupeshe, nyenga.

211 Ai, mwanami. Mwaketekela mba Lesa usa kumubuka kikola kyalubazhibazhi ne kumulengela waikala bulongo? Mwikiketekela nyi? Kijitu bulongo. Ai, mutemwe, kwimune mu maboko.

212 Lesa Mutemwe, fumyaipo akya kintu kyatama pa yuwe songwalume wamuचेचे, ne kwikala na bumi kabiji waikala bulongo. Mu Jizhina ja Yesu. Amena.

213 Lesa akupeshe, mulongo. Mwaketekela kyokyo, kechi ibyo nyi? Musakwikalatu bulongo. Kechi muzhinauke nangwa pacheche ne.

214 Wakila mu bwanyike kwikala nakikola kya muchima. Mwaketekela mba Lesa usa kwimulengela kwikala bulongo? Yanga, na kwaamba mba, “Nemusachila Anweba, Nkambo, pa kumbuka.”

215 Mwaketekela mba Lesa usa kubuka lukatazho lwa munda kabiji ne kwi mulengela kwikala bulongo? Yainga, na kusangalala, ne kwaamba mba, “Nemusachila Anweba, Nkambo.”

216 Aye ukijitu Lesa, kechi byo Aji nenyi? Kintutu kyo mwafwainwa kuuba ke kuketekelatu. Akyo kiji bulongo nyi? Bushe mwaketekela Mwaana muntu mu moba akumpelo?

217 Pajipo kintu kimo kyajikumweka kuno mu mamineti acheche apita kunyuma, kabiji Amiwa kechi . . .kweseka kutana kokyajinga. Muntu umo wajinga nalwitabilo ne kubapo kintu kimo. Nangwa, kape ke Byuba Mulungu ubena kwiya, nangwa kimye kyo Nakonsha kuuba. Bushe anweba—anweba . . .Akyo kyabwela jibiji. Mwasutula kuboko kwenu peulu. Bushe mwaketekela mba Lesa wafwainwa kubuka alwa lukatazho lwa muchima, kwi mulengela kwikala bulongo, kubuka mwaanenu wamukazhi koaji na—na . . .Mwikiketekela nyi? Mrs. Neff, mwaketekela mba Lesa . . . Leo Neff. Amiwa kechi ne muyuka ne, bino abyo byobyo muji. Muji nalukatazho lwa muchima, kabiji ne

mwaanenu wamucheche wamukazhi uji nalukatazho lwa jifyo. Mwaketekela mba usa kwikalatu bulongo? Lwitabilo lwenu lwi mulengela kwikala na bututulu. Ketekelaitu na muchima wenu yense.

218 Obewa uji kunyuma aako, waimana kunyumaako na lukatazho lwa munda, Yesu Kilishitu e mubuke.

219 Mwaketekela nyi? Aye ujitu pamo keesha, leelo, ne myaka yonse. Twayai twiteteke maboko etu umo pa mukwabo pano. Oo, langulukai pa kimye kyo tujipo, langulukai pa kimye. Langulukai amba tuji monka Kyeenyi kya Yesu Kilishitu, aye Mwaana wa Lesa. Aye walaile mba Ukoba bibye moba akumpelo. Njina maboko onateteka pa bitambala.

220 Lesa Mutemwe, Nalomba amba Anweba musakupesha atwe tutambala pa kuleta lubuko pamibiji ya bantu, kupichila mu Jizhina jaji Yesu Kilishitu.

221 Pano, na maboko enu omwateteka umo pa mukwabo, umo mwi anweba ke ba membela ba Mubiji wa Kilishitu. Aye Mupashi Wazhila yeka umo walaile kusolola byafyamika bya mu michima ne kuuba bibye bintu, Aye uji mwi anweba. Anweba mwilubaji Lwaji, kabiji Aye ye lubaji lwenu. Pano, Aye waambile mba, "Abye biyukilo bikebalondela aba bamuketekela." Abo ye anweba. "Inge bateteka maboko abo pa bakolwa, bakakosa." Pano, kwi lombelela anweba bene ne, lombelelai ao ye mwatetekapo maboko enu, mambo ne abo babena kwimulombelela. Pano twayai tulombele pamo, kabiji kechi pekalepo nangwa umotu muntu ao wakokelela mu kino kinshimikwa. Kika kyo twafwainwa kupembelela kyabaya, mutemwe mulongo wami, nyenga, Uji pano, Mupashi Wazhila, Lesa, ponka pano, kyonka Kintu kyo twaambapo.


222 Yesu Mutemwe, twamona kutanwapo kwa Kyeenyi Kyenu pano. Anweba mwabwezhezhe bumi mu koka kaana kakacheche juba jikwabo, panyuma ya kufwa, ku milombelo ya lwitabilo. Lesa Mutemwe, muji bavula muno abo botwakakalwa kufikako, kimye kibena kupita, pakuuba bateteka maboko abo umo pa mukwabo. Abo ke baketekela. Twaikala mu Kyeenyi kya kwa Nkambo Yesu Kilishitu, wasangukile mubafu, ujitu pamo keesha, leelo, ne myaka yonse.

223 Satana, washindwa! Yesu Kilishitu wakushijile! Aye wabukile kubafwa kabiji tuji nanji bufuku buno, kushinikisha Aye Mbila ya moba akumpelo. Fumamo mubabo bantu! Baleke, mu Jizhina ja Yesu Kilishitu! "Mu Jizhina Jami bakapangilamo bademona," kabiji wapangwamo. Mu Jizhina ja Yesu Kilishitu, fuma mukino kipwilo!

224 Anweba bonse muno mwatambululwa lubuko lwenu, ngi manaiko. Muntu yense watambulwila lubuko, imanaiko. Sutulaiko maboko enu ne kumutakaika Aye!

“Amiwa pano natambulwila lubuko lwami,” ambai kyokyo kwi Lesa. “Amiwa pano natambulwila lubuko lwami. Anweba mujitu pamo keesha, leelo, ne myaka yonse, Kilishitu. Amiwa pano nemuketekela Anweba, nkwashai Anweba pa kubula lwitabilo. Amena.”

Amiwa kamutota Aye, Amiwa kamutota Aye,  
Mutotai Mwaana mukoko waipailwe babi;  
Mupai Aye lukumo, anweba bantu bonse,  
Mambo Mashi Aji aomvwa kiko kyonse.

<sup>225</sup> Bushe Aye kechi mwamutemwa ne? [Kipwilo kyaamba mba, “Amena.”—Waku.] Twayai tumutote Aye nanchi. Muntu yense, na maboko enu asutulwa, mupai Aye lutotelo, kimye mulongo kyo abena kwiya na kwitulupula. 

*KAJO KABUMUPASHI KA MUKIMYE KYAAKO* KDE65-0718E

(Spiritual Food In Due Season)

Ino Mbila na Mulongo William Marrion Branham, yalupwilwe patanshi mu Kizungu pa Mulungu mabaanga, Makumbikumbi 18, 1965, ku Branham Tabernacle mu Jeffersonville, Indiana, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2020 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)